



JORNAL do Parlamento Nacional

VI LEGISLATURA

2.ª SESSÃO LEGISLATIVA (2023-2028)

REUNIÃO PLENÁRIA DE 10 DE FEVEREIRO DE 2025

Presidente: Ex.^{ma} Sr.^a Maria Terezinha da Silva Viegas

Vice-Presidentes: Ex.^{ma}
Ex.^{mo} Sr. Alexandrino Afonso Nunes

Secretária: Ex.^{ma} Sr.^a Virgínia Ana Belo

Vice-Secretárias: Ex.^{ma} Sr.^a

SUMÁRIO

Sr.^a Presidente Maria Terezinha da Silva Viegas, hafoin verifica quórum, declara aberta sessão plenária iha tuku 9 liu minuto 24 no halo kedas leitura ba agenda serbisu loron ne'e nian.

Antes Ordem do Dia – Sr.^a Secretária da Mesa halo leitura ba carta justificação de faltas Sr.

Deputado Manuel Henrique Noronha no Sr.^a Deputada Maria Terezinha da Silva Viegas nian.

Tuirmai, tanba relatório rua, ida kona-ba atividade delegação Assembleia Inter-Parlamentar da ASEAN (AIPA) iha Vientiane, República Democrática Popular de Laos, no ida seluk kona-ba visita Comissão de Negócios Estrangeiros,

Defesa e Segurança Nacional nian bá Instalações Componente Unidade das Forças Especiais das F-FDTL nian iha Tasi-Tolu, distribui tiha ona, nune'e avança kedas ba agenda n.º 4, «Declaração política das Bancadas Parlamentares da FRETILIN e do KHUNTO».

Declaração política Bancada FRETILIN nian toca ba problema iha serviço saúde nian, ho ênfase ba número ema mate iha HNGV ne'ebé liu ona husi padrão OMS nian, além de problema sira seluk iha HNGV, hodi husu ba Primeiro-Ministro atu demite Sr.^a Ministra da Saúde.

Iha ninia vez, Bancada KHUNTO retira ninia declaração política.

Tuirfalimai mak intervenções diversas Sr. Deputado sira-nian, iha-ne'ebé sira levanta questão sira hanesan: número livro kona-ba orçamento ne'ebé Governo submete ba Parlamento Nacional; eletricidade lakan-mate iha Díli; Madre Josefina Bakhita ne'ebé harii uma-mahon ida ba ferik-katuas abandonado sira iha Metinaro; companhia *Waskita Karya* ne'ebé halo estrada iha Bobonaro sem qualidade; condição estrada entre Liquiçá ho Loes no mós Ponte Loes no Nunura nian; atuação violenta membro polícia balu nian, inclui ba ema ho deficiência mental ida iha Viqueque; denúncia husi enfermeiro ida iha Centro Saúde Uatulári nian kona-ba falta ai-moruk; Hospital Siloam Jacarta ne'ebé rejeita paciente husi Timor-Leste; falta centro reabilitação nian ba ema ho deficiência; vitória boxista timoroan na'in-rua nian iha Indonésia; rumor kona-ba cobrança ilegal iha EBC Haubá; visita Primeiro-Ministro no Ministro das Obras Públicas nian ba Ermera atu haree condição estrada iha-ne'ebá; tomada de posse ba ocupante cargo chefia nian iha MSS; polémica kona-ba exploração mina-matan *Greater Sunrise*; ataque verbal husi Deputado balu ba figura Xanana Gusmão nian; assessor ida iha Parlamento mai serbisu iha tempo kalan; motorista

carreta Estado nian balu ne'ebé viola regra trânsito nian sira; comportamento membro grupo arte marcial balu nian; assinatura acordo kona-ba fronteira marítima ho Austrália; liafuan «estimada» iha declaração política Bancada FRETILIN nian; falta manutenção ba rate sira iha Jardim dos Heróis Metinaro no cemitério Santa Cruz; condição estrada iha Município Lautém no celebração cultural coleta *meci* (ular-tasi) iha Loré; notícia husi jornal *Independente* kona-ba falta cadeira ho meja iha EBF Oesilo; ró Sucess ne'ebé halo operação entre Díli ho Oe-Cusse; relação entre trânsito no construção loja andar sira iha estrada-ibun iha Díli laran; avaria eletricidade iha Lacluta; construção ne'ebé la realiza hafoin lançamento ba estrada balu iha Município Viqueque; controvérsia kona-ba transferência funcionário público na'in-rua iha RAEOA; exoneração Sr.^a Elvira Manat husi nia cargo iha RAEOA; necessidade atu aumenta número voo bá-mai Timor-Leste; desorganização iha Mercado Taibesi; campeonato futebol U15; falta combustível ba ambulância no ai-moruk iha hospital no centro saúde sira; condição estrada entre Maliana ho Bobonaro; demora iha construção estrada entre Ponte Nunura ho Maliana Vila; *Zebra Cross* sira iha Díli laran; chinesa sira-ne'ebé halo uma andar uza *besi baja*; relação entre consumo energia eletricidade nian ho construção uma andar boboot sira; qualidade rede internet; transporte público ne'ebé uza *reben*; demora iha construção estrada iha Ai-Mutin; consulta médica iha clínica Flodova Farma; Lixo iha área Raikotu nian.

Ikusmai, Sr. Vice-Ministro dos Assuntos parlamentares, Adérito Hugo da Costa, hatán ba questão hirak ne'ebé Deputado sira foti.

Ordem do Dia – 1. Anúncio de abertura do processo de apresentação de candidaturas para a eleição pelo Parlamento Nacional de dois

membros para o Conselho de Imprensa (de acordo com a informação n.º 1/2025/DIPLIN).

Senhor Deputado no Senhora Deputada sira-ne'ebé halo intervenção mak: Helena Martins Belo (FRETILIN), Cedelízia Faria dos Santos (CNRT), Maria Teresa da Silva Gusmão (PD), Lúdia Norberta dos Santos Martins (FRETILIN), Virgílio Pereira (CNRT), Dário Madeira, José da Cruz (FRETILIN), Gabriel Soares, Domingos Augusto «Deker» (CNRT), Florentino Ximenes da Costa «Sinarai» (FRETILIN), Luís Roberto da Silva (KHUNTO), Francisco da Costa «Ikulay» (CNRT), António da Conceição «Kalohan» (PD), Olinda Guterres (KHUNTO), José Virgílio R. Ferreira (CNRT), David Dias Ximenes «Mandati», Maria Angélica Rangel da C. dos Reis (FRETILIN), Natalino dos Santos Nascimento, Aliança da Conceição Araújo (CNRT), Antoninho Bianco (FRETILIN), Armando dos Santos Lopes (PD), Firmínio Taequi (CNRT), Óscar Lima (FRETILIN), Anacleto Freitas (CNRT), Sância Florência Paixão Bano (FRETILIN), Maria Angelina Lopes Sarmento (PLP), Maria Gorumali Barreto (CNRT), Antoninho Doutel Sarmento (FRETILIN), Carmina Carlota, Marcos Xavier (CNRT), Luís Roberto da Silva (KHUNTO).

Sr.^a Presidente encerra reunião plenária ne'e iha tuku 11 liu minuto 55.

Sr.^a **Presidente** (Maria Terezinha da Silva Viegas): — Dala ida tan, ha'u husu ba distinto Deputado sira hotu atu hola fatin atu nune'e ita hahú Plenário ba loron ohin nian.

Horas hatudu tuku 09 liu minuto 24.

Ita iha quórum de funcionamento ho 32 Deputados presentes, por favor, distinto Deputado sira, Ita-Boot sira ko'alia iha kraik ne'ebá ne'e quase que preenche tiha de'it sala plenária ida-ne'e nia laran, favor ida-idak hola fatin.

«Agenda n.º 131/VI(2.^a) – Reunião plenária de segunda-feira, 10 de fevereiro 2025

Abertura

Período de Antes da Ordem do Dia:

1. Justificação de faltas dos Srs. Deputados Manuel Henrique Noronha e Maria Terezinha da Silva Viegas.

2. Distribuição e apreciação do relatório de atividades da delegação da Assembleia Inter-Parlamentar da ASEAN (AIPA) em Vientiane, República Democrática Popular de Laos.

3. Distribuição e apreciação do relatório da visita da Comissão de Negócios Estrangeiros, Defesa e Segurança Nacional às instalações da Componente Unidade de Força Especial das F-FDTL em Tasi-Tolu.

4. Declarações políticas das Bancadas Parlamentares da FRETILIN e do KHUNTO.

5. Intervenções diversas dos Senhores Deputados.

6. Intervenção do Senhor Vice-Ministro dos Assuntos Parlamentares sobre as questões suscitadas pelos Srs. Deputados.

Período da Ordem do Dia

Anúncio da abertura do processo de apresentação de candidaturas para a eleição pelo Parlamento Nacional de dois membros para o Conselho de Imprensa (de acordo com a informação n.º 1/2025/DIPLN).»

Antes de tudo, ha'u-nia desculpa e bom dia ba distinto Deputado sira hotu no mós ba Sr. Vice-Ministro dos Assuntos Parlamentares.

Ho nune'e, ha'u fó kedas ba Sr.^a Secretária halo leitura ba agenda n.º 1.

Faz favor.

Sr.^a **Secretária da Mesa** (Virgínia Ana Belo): — Obrigada, Sr.^a Vice-Presidente.

Bom dia ba Ita-Boot, Sr. Vice-Ministro dos Assuntos Parlamentares, colegas Deputados e mós audiência sira hotu.

«Requerimento de justificação de faltas

Excelentíssima Sr.^a Presidente do Parlamento Nacional,

Manuel Henrique Noronha, Deputado ao Parlamento Nacional, pertencente à Bancada do PD, vem requerer a Vossa Excelência que se digne considerar justificada a falta dada à reunião do Plenário no dia 3 de fevereiro de 2025 por motivo de razões ponderosas.

Data, 5 de fevereiro de 2025

O Deputado,

Manuel Henrique Noronha»

«Requerimento de justificação de faltas

Excelentíssima Sr.^a Presidente do Parlamento Nacional,

Maria Terezinha Viegas, Deputada ao Parlamento Nacional, pertencente à Bancada do CNRT, vem requerer a Vossa Excelência que se digne considerar justificadas as faltas dadas à reunião do Plenário e comissão nos dias 27, 28 e 30 de janeiro, e 3 de fevereiro de 2025, por motivo de razões ponderosas.

Data, 6 de fevereiro de 2025

A Deputada,

Maria Terezinha Viegas.»

Obrigada, Sr.^a Vice.

Sr.^a **Presidente** (Maria Terezinha da Silva Viegas): — Ho nune'e, agenda números 2 e 3 já foram distribuídas na mesa dos Srs. Deputados, tuirmai, ita ba agenda n.º 4 – Declarações políticas das Bancadas Parlamentares da FRETILIN e do KHUNTO.

Ho nune'e, ha'u fó kedas tempo ba Bancada da FRETILIN.

Faz favor.

Sr.^a **Helena Martins Belo** (FRETILIN): — Obrigada ba tempo.

Bom dia ba Presidente em exercício, composição da Mesa, Sr. Vice-Ministro dos Assuntos Parlamentares, colegas Deputados, Buibere no Maubere sira.

«FRETILIN bolu ita hotu nia atenção no ação concreta ho urgente ba salva serviço saúde iha Timor-Leste.

Iha fulan kotuk, Hospital Nacional Guido Valadares, liuhusi Diretora Nacional Administração, Finanças no Aprovisionamento, reconhece katak número ema mate iha Hospital Nacional iha tinan 2024 nian liu ona padrão husi Organização Mundial da Saúde. Iha relatório ne'ebé apresenta husi Diretora Sara Maria Filomena ba Rádio e Televisão de Timor-Leste hatete, “paciente ne'ebé tama hospital la to'o loron rua ka menos husi horas 48 mate hamutuk 53 por ema rihun ida no liu horas 48 mak mate hamutuk 29 por ema rihun ida». Iha tinan 2024, paciente liu rihun rua mak mate iha hospital, liu *standar* normal ne'ebé Organização Mundial Saúde nian estabelece. Número ida-ne'e boot tebes, la inclui labarik no bebé sira-ne'ebé iha cuidado pré-natal no pós-natal. Ida-ne'e foin dados husi Hospital Nacional Guido Valadares de'it, ita seidauk hatene dados husi hospital referal, municipal no centro saúde sira.

Iha Hospital Referal Baucau, ne'ebé iha capacidade fó baixa ba ema uitoan de'it, la to'o ema na'in-50, mós ikuikus ne'e número ema mate começa sa'e maka'as. Informação ne'ebé ami simu, loron ida bele to'o na'in-haat ka na'in-lima mak mate.

Iha semana kotuk, Diretora Nacional da Saúde Materno-Infantil denuncia ba público, liuhusi Diário Nacional, katak inan no bebé rihun-ida resin maka mate iha tinan rua ikus ne'e. Número inan no bebé ne'ebé mate liu rihun ida ne'e la normal ona.

Bainhira sistema saúde la bele salva bebé sira-ne'ebé foin atu moris, sá esperança mak ita iha iha ita-nia ukun ida agora?

Husi informação ne'ebé hato'o husi diretora na'in-rua ne'e, se ita, político sira iha Parlamento ida-ne'e, no liuliu Governo, iha duni seriedade atu serbí povo tuir juramento ne'ebé ita halo iha tomada de posse, momento atu ita hatudu oinsá ita serbí povo, oinsá bele hadook povo husi moras no bele trata sira-ne'ebé moras, nune'e, karik mate mós tanba destino duni, la'ós tanba serviço saúde ida-ne'ebé la di'ak, ho menos facilidade no ai-moruk.

Atubele hatene realidade liután, koko loron ida bá netik iha sala mortuário Hospital Nacional, loron ba loron nakonu ho mate-isin de'it, hanesan expressão pública ne'ebé ohin loron sai *viral*, katak «moras tama hospital ho ambulância mutin, sai fali ho ambulância metan». Se ita sira-ne'e visita duni ita-nia família ruma moras iha hospital, ita atu nega realidade ida-ne'e susar tebes tanba realidade ida-ne'e mak loos duni.

Informação husi Hospital Guido Valadares no Direção Saúde Materno-Infantil nian hatudu momoos saida maka ami sempre levanta iha Magna Casa ida-ne'e, sistema saúde destruído no lakon nia capacidade atu salva ita-nia população. Ida-ne'e urgente atu Governo buka nia solução imediata atu sai husi problema saúde, antes sistema saúde monu ba catástrofe nia laran.

Maluk sira, iha semana kotuk Ministro da Saúde fó-sai katak foin maka verifica hotu recibo sira husi hospital sira husi rai-li'ur hodi selu dívida ne'ebé iha. Precisamente, fulan hitu ka ualu hodi halo verificação recibo enquanto moras sira-ne'ebé precisa tebes atu evacua hodi bele salva sira-nia vida maibé la bele evacua no ikusmai lakon sira-nia vida. Exemplo ida maka saudoso Maukalo, no povo barak tan. Maibé, iha sorin seluk, Diretor Serviço Nacional de Inteligência, Sr. Longuinhas Monteiro, moras kois bele hetan evacuação especial tebes, no Governo bele buka osan ho lailais atu selu nia viagem ba tratamento. Tanbasá maka Governo bele halo discriminação ida-ne'e ba nia povo? Se especial liu ba Sr. Longuinhas Monteiro, oinsá ho veterano no ex-combatente sira-ne'ebé hein hela ba tratamento iha rai-li'ur maibé seidauk hetan?

Fornecimento ai-moruk ho equipamento iha Hospital Nacional Guido Valadares loron ida iha, loron ida la iha, paciente sira hadau sorte de'it. Bainhira baixa iha tempo *stock* iha, bele halo tratamento, se baixa iha tempo *stock* la iha, tem que bá sosa iha clínica privada ka husik hodi hein de'it. Caso concreto mak hanesan *CT scan* ne'ebé dala barak avaria no prejudica processo diagnóstico, hanesan caso ne'ebé Camarada Deputado David Dias nia feto-foun enfrenta to'o lakon nia vida. Bainhira protesta, máquina *CT scan* ne'e di'ak fali, maibé atu imprime fali la di'ak. Nune'e de'it loron-loron.

Dala ruma plástico hodi tau raan tebetebes mós la iha. Bainhira paciente balu precisa doação raan, família sira pronto halo doação, plástico atu rai raan ba laran mak la iha fali. Doutor sira iha Hospital Nacional Guido Valadares rasik confessa katak iha necessidade urgente atu instala centro oncologia, tanba to'o agora paciente ne'ebé precisa custo boot tebes ba tratamento iha rai-li'ur maka paciente oncologia, sira-ne'ebé sofre moras cancro. Urgente tebes atu hahú harii centro oncologia no cardiologia iha ita-nia Rain hodi responde ba necessidade ne'ebé ita-nia Rain iha. Ami continua exige atu Governo tau atenção ba falta sira-ne'ebé hospital hasoru to'o ohin loron.

Excelência Presidente em exercício, colega Deputado no Deputada sira, problema saúde iha Timor-Leste la'ós problema falta recursos humanos ka financeiro maibé falta boot iha liderança no gestão rasik, falta capacidade no vontade atu resolve problema no ignora de'it, hodi husik povo hadau nia moris ho sorte de'it.

Desde apontamento Sr.^a Élia Amaral ba Ministra, to'o ohin loron ita la hare melhoria ruma husi serviço saúde iha ita-nia Rain, tanba ita hotu hatene oinsá competência técnica no capacidade gestão Sr.^a Élia nian. Ita labele husik serviço saúde sai rahun tanba de'it ema ida nia sala.

Sr. Primeiro-Ministro ho ninia partido tenta, ho esforço hotu-hotu, atu protege Sr.^a Ministra Saúde hodi nega realidade dura ne'ebé ita-nia povo hasoru iha saúde pública.

Pergunta maka: tanbasá mak tem que protege Ministra, la'ós protege povo?

Ita hotu ne'ebé iha Parlamento ida-ne'e labele lakon ita-nia fuan hanesan ema, precisa buka dalan hamutuk ho Governo atu sai husi problema saúde ne'ebé iha. FRETILIN iha ninia hanoin katak la'ós ona tempo atu duun malu sé mak sala no sé mak loos, maibé tempo atu fó solução ba problema saúde ne'ebé ita-nia Rain rasik hasoru. Governo ne'ebé ukun tanba fiar husi povo tem que assume ho responsabilidade atu protege ita-nia povo. Governo, loron-loron, dehan atu desenvolve ita-nia Rain no povo nia moris, desenvolve ema nia moris, significa katak haburas ka transforma ema ida-idak nia moris husi condição ida aat liu ba ida di'ak liu fali. Maibé, agora husik de'it povo mate loron-loron iha facilidade saúde sira, sá desenvolvimento mak ita hakarak halo ba ita-nia Rain ida-ne'e?

IX Governo Constitucional, ne'ebé liderado husi Sr. Xanana Gusmão, kaer ukun besik tinan rua ona, normal atu avalia fali Governo, membro Governo sira-nia desempenho no buka atu corrige hodi serbí di'ak liután ita-nia povo.

FRETILIN lakohi atu comenta kona ba ida-ne'e, maibé situação saúde ne'ebé sai aat ba beibeik, ami husu favor ba Sr. Primeiro-Ministro, bele karik, demite Sr.^a Élia husi Ministra Saúde hodi troca fali ho quadro CNRT seluk ne'ebé competente no iha experiência liu atu ajuda resolve problema saúde ne'ebé ita hasoru hela. Bainhira Sr. Primeiro-Ministro rona ho fuan ba relatório sira kona-ba moras no mate iha facilidade saúde, facto sira atendimento saúde ne'ebé aat ba beibeik, halerik ho matan-been husi família sira-ne'ebé desesperado hela iha facilidade saúde no sira-ne'ebé lakon tiha ona sira nia família, soma sira-ne'e hotu suficiente ona atu halo decisão ida prudente hodi salva povo do que protege ema ida. Bainhira Sr. Primeiro-Ministro la iha coragem atu demite Sr.^a Ministra Saúde atual, significa Sr. Primeiro-Ministro Xanana Gusmão prefere protege fali estimada Sr.^a Ministra do que protege ninia povo rasik.»

Obrigada, Sr.^a Presidente em exercício.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

A seguir, ha'u fó ba Bancada KHUNTO atu ható'o nia declaração.

Faz favor.

Sr. **António Verdial da S. Ferreira** (KHUNTO): — Obrigado, Presidente em exercício.

Retira.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, ita tama kedas ba intervenções diversas.

Atu informa ka anuncia de'it ba Plenário katak iha-ne'e iha ona 15 Deputados inscritos, ho nune'e ha'u taka ona ba intervenção tanba ita-nia Plenária ba to'o 11h00. Devido a termos um convite do Vice-Primeiro-Ministro sobre OMK (Organização Mundial do Comércio), ho nune'e ita-nia

Plenário sei ba to’o 11h00, ou máximo 11h30, tanba aqui já temos 15 inscritos, mais um que acabou de inscrever.

Ho nune’e, ha’u fó kedas ba primeira intervenção ba distinta Deputada Cedelízia Faria dos Santos.

Faz favor.

Sr.^a **Cedelízia Faria dos Santos** (CNRT): — Muito obrigada, Sr.^a Presidente em exercício.

Ha’u-nia bom dia no respeito ba Ita-Boot, Sr.^a distinta Secretária, distinto Deputado sira, Sr. Vice-Ministro dos Assuntos Parlamentares, audiência ne’ebé acompanha hela iha sala plenária ida-ne’e, mídia, maluk rona-na’in Rádio Parlamento Nacional no povo doben Timor-Leste.

Excelência Vice-Ministro, uluknanain, ha’u hakarak agradece ba IX Governo, tanba bele submete ona relatório execução orçamento ba trimestre ikus OGE 2024 nian tuir tempo, maibé, normalmente, carta acompanhamento ne’ebé ami simu, livro sira-ne’e só 65 livros ba 65 Deputados. Hanesan Comissão C, ami husu, karik iha futuro livro sira-ne’e bele 66 livros, atu nune’e livro ida bele husik ba Comissão C. Tanba baibain ami hetan despacho husi Presidente Parlamento Nacional sem livro, então Presidente Comissão tem que fó nia livro ba técnico sira hodi halo análise. Baibain ne’e acontece hanesan ne’e, ne’ebe ami fó-hanoin hela ba Governo, ba oin karik labele 65 livros, se bele 66 para livro ida bele tau iha Comissão C.

Tuirmai, ha’u continua lamenta ho eletricidade ne’ebé mate-lakan iha ita-nia capital, Díli, no mós iha município sira hotu.

Ami fahe experiência, foin daudaun ami bá halo fiscalização iha Ministério das Finanças, ahi ne’e mate hela de’it, mate-lakan mate-lakan. Ami preocupa, Excelência Vice-Ministro, tanba ita hatene finanças mós iha sasán eletrónico barak, ita usa sistema *online* no buat hotu com certeza usa eletricidade. Ha’u rona katak sira iha-ne’ebá iha gerador, maibé, ha’u hanoin, ho ahi lakan mate ne’e prejudica tebetebes ba serbisu hotu iha Ministério das Finanças.

La’ós ida-ne’e de’it, Excelência, ha’u hanoin, sira-ne’ebé hela iha parte Comoro hatene muito bem katak eletricidade iha-ne’ebá lakan-mate, estraga ema nia sasán barak. *Bisnis* ki’ikoan sira-ne’e fa’an *ice cream*, fa’an sorvete, caramelo, ne’e mós precisa eletricidade. Edifício boboot ne’e sei bele iha gerador ba cobre, *back up*, maibé ita-nia povo ki’ikoan sira, coitado, nia *bisnis* ki’ikoan sira-ne’e tem que lakon ninia retorno ba *income* loron ida nian, ne’ebe ami husu filafali ba Governo, favor ida tau atenção ba ida-ne’e. Liderança iha eletricidade ne’ebá halo nu’usá loos mak Ita-Boot sira husik hela de’it nia iha-ne’ebá? Ami acompanha, comissário ida nia serbisu di’ak liu fali Presidente EDTL. Comissário ida mak loroloron iha terreno, iha terreno, Presidente transa tiha an iha-ne’ebá. Ami husu

mós ba Presidente EDTL, se nia la *mampu* karik, di'ak liu resigna an de'it ona, do que nia halo povo barak terus tanba de'it hahalok sira-ne'e.

Ne'ebe, ha'u hanoin, ida-ne'e mak ha'u husu hela ba Excelência Vice-Ministro, favor ida tau atenção lai ba ida-ne'e.

Muito obrigada, Sr.^a Presidente em exercício.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

Tuirmai, distinta Deputada Maria Teresa Gusmão.

Faz favor.

Sr.^a **Maria Teresa da Silva Gusmão** (PD): — Obrigada, Sr.^a Presidente em exercício.

Bom dia ba Ita-Boot, composição Mesa, distintas no distintos Deputados, Vice-Ministro dos Assuntos Parlamentares no maluk rona-na'in sira.

Ohin ha'u hakarak foti assunto kona-ba idosos abandonados iha Metinaro.

Iha quarta-feira, 22 de janeiro de 2025, Comissão F halo fiscalização iha Centro Saúde Metinaro, Município Díli. Husi conversa privada mak ha'u hatene katak Chefe Centro Saúde Metinaro mak Irmã ka Madre Josefina Bakhita Soares de Araújo.

Ha'u hahú ho nia biografia badakoan ida.

Madre Josefina Bakhita, nu'udar licenciada iha farmácia, nu'udar mós fundadora Congregação Filhas Missionárias da Divina Misericórdia (FMDM), dedica an ba obra caridade ba idosos abandonados iha Metinaro. Madre Josefina Bakhita, foinsa'e oan ida, moris iha Manatuto Reinbour, feto mesak e oan mesak.

Nia hahú obra caridade ida-ne'e ho nia salário rasik nu'udar funcionária pública ho *level 4*. Sira iha Metinaro hamutuk 10, irmã júnior na'in-rua, nia fó escola ba sira na'in-rua iha UNTL (Universidade Nacional Timor Lorosa'e), ida foti saúde e ida fali psicologia, ho tan menina menor ida-ne'ebé nu'udar vítima violação sexual.

Irmã ka Madre Josefina Bakhita sosa rai iha Metinaro iha F-FDTL nia oin, parte liman karuk, ho osan crédito ho nia salário rasik. Além de avó idoso na'in-haat iha uma comunidade, congregação mós atende idosos abandonados 13 iha li'ur tanba fatin la to'o no avó balu mós lakohi bá hela iha uma comunidade, nune'e loroloron sira bá fó haris, troca *popok*, fó han, troca, fó ai-moruk no seluk-seluk tan.

Avó sira iha osan idoso nian maibé família sira foti no usa tiha, avó ida de'it mak nia caderneta bancária fó ba irmã kaer, maibé gastos tuir avó nia hakarak. Wainhira sosa tiha rai atu hahú construção uma ba idoso, osan la iha, nune'e madre ne'e bá hasoru Presidente da República, Excelência José Ramos Horta, e Presidente da República husu, karik ministério relevante la fó tulun. Madre ne'e

hatán, hato'o ona pedido, maibé seidak iha resposta. Nune'e Presidente da República hatán, sira la atende tanba seidak comprende buat hirak ne'e, maibé Gabinete Presidente da República iha osan uitoan atu fó tulun. Tanba obra caridade ida-ne'e tulun tebes Estado no Governo nia serviço, nune'e Presidente da República ajuda 30 mil dólares hodi harii uma ba idosos no comunidade FMDM iha tinan 2023.

Agora, problema atual ne'ebé ha'u atu hato'o mak quarto ba idoso ida de'it no utiliza ba avó na'in-haat de'it, atualmente avó feto ho mane iha quarto ida de'it. Avó idoso seluk atu tama tan maibé quarto la iha ona.

Iha II Vice-Primeiro-Ministro e Ministro Coordenador dos Assuntos Sociais iha fundo atu tulun ba religioso no religiosa sira, maibé congregação FMDM la bele iha acesso tanba estatuto sei iha processo laran atu aprova tuir regra canónica Vaticano, Roma nian, tanba pedido hotu-hotu ba ajuda husi fundo ne'e tem que assina husi bispo no pároco.

Preocupação boot liu mak atu aumenta quarto, atu nune'e bele simu tan idoso abandonado sira, nune'e, iha intervenção ida-ne'e, ho laran luak tebetebes, husu ba Vice-Ministro atu hato'o hela iha Conselho de Ministros, liuliu Ministério da Solidariedade Social no ministério relevante, atubele fó-tulun aumenta tan quarto, nune'e bele simu tan ita-nia avô idoso abandonado sira.

Husu mós ba GMPTL (Grupo de Mulheres Parlamentares de Timor-Leste), karik iha tempo, bele bá visita nu'udar solidariedade ba feto maluk foin-sa'e ida, ne'ebé iha vocação dedica nia an tomak ba maluk avó idoso sira.

Aproveita mós fó informação ida-ne'e, maluk rona-na'in sira, karik iha avôs idosos, família trata ho domin no digno! Maibé, gere tempo la to'o karik, ita iha ona fatin iha Metinaro atubele fó-tulun família sira tau matan ba ita-nia avó sira ho domin no digno.

Ida-ne'e de'it mak ha'u hakarak hato'o, e husu tebes ba Vice-Ministro atu hato'o informação ida-ne'e ba Conselho de Ministros.

Obrigada barak.

Sr.^a **Presidente** (Maria Terezinha da Silva Viegas): — Muito obrigada, distinta Deputada. Antes atu continua, ha'u fó ponto de ordem ba Deputada Lúdia Norberta.

Sr.^a **Lúdia Norberta dos Santos Martins** (FRETILIN): — Obrigada, Sr.^a Presidente.

Atu reforça de'it intervenção Sr.^a Deputada Maria Teresa nian.

Relaciona ho ida-ne'e, buat ida tratamento ba maluk portador deficiência ne'e to'o agora Estado nunca cria condição.

Tuirfali, segundo caso, mak maluk idoso sira só igreja mak halo ida-ne'e, e, Madre Josefina Bakhita ne'ebé harii congregação foun FMDM ne'e hala'o duni serviço ida-ne'e.

Ohin Sr.^a Deputada hatete katak GMPTL tem que bá, mas, ha'u recomenda mós, se bele karik, Comissão F mós tem que bá haree, hodi bele fó atenção ida-ne'e. Claro que iha gestão balu iha subvenção Estado fó ba Igreja Católica hodi bele sustenta sira-nia necessidade, talvez, la hatene gestão ne'e halo nu'usá, la to'o iha organização sira hanesan ne'e.

Mas la'ós de'it ida-ne'e, iha organização sira balu, por exemplo congregação Madre Teresa Calcuta nian iha Aileu, sira mós halo atendimento ba maluk sira-ne'ebé moras lepra e sira ladún hetan apoio ba ida-ne'e. Ne'ebe, se bele karik, gabinete sociedade civil, wainhira fó apoio sira-ne'e, haree didi'ak to'ok para nune'e ajuda ne'e bele to'o iha organização sira-ne'ebé, no fundo, reforça Estado hodi bele atende ita-nia maluk sira-ne'ebé precisa atu hetan atenção especial.

Obrigada.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

A seguir, distinto Deputado Virgílio Pereira.

Faz favor.

Sr. **Virgílio Pereira** (CNRT): — Di'ak, obrigado ba biban.

Ha'u-nia respeito ba Sr.^a Presidente interina, composição da Mesa, Vice-Ministro dos Assuntos Parlamentares, colega distinta Deputada e distinto Deputado sira hotu, bom dia ba ita hotu.

Iha dadeer kmanek ida-ne'e ha'u hakarak atu hato'o mós informação ruma relaciona ho estrada direção Bobonaro nian. Iha semana liubá ha'u halo viagem ida ba Município Bobonaro, ha'u consegue haree estrada ida-ne'ebé companhia internacional halo, mai ho naran ida companhia internacional, mas pior liu fali companhia local. Companhia local balu kaer obra ne'e, ita haree, pelo menos nia qualidade ne'e di'ak, mas companhia ida naran *Waskita Karya* ne'e, favor ida, Sua Excelência Vice-Ministro chama hela atenção, fó-hatene hela ba Sua Excelência Ministro das Obras Públicas, para bolu atenção ona, tanba quase atu ba tinan ida ona mas estrada ne'e, eipah, hanoin katak Bobonaro oan sira-ne'e atu sente alegria ona mas pior liu fali, hanesan halai iha tahu laran, husi Ponte Nunura tama to'o iha Bobonaro Vila.

Segundo, ha'u hakarak, liu husi biban ida-ne'e, husu hela ba Presidente IGE (Instituto de Gestão de Equipamentos), estrada husi Liquiçá nian tesik ba ne'e quase fatuk sira-ne'e monu nadodon loos iha estrada até to'o *jalur* Loes nian, tanba ne'e, husu ba IGE atu normaliza hela. Tanba fatuk sira-ne'e tun mai taka estrada tomak, talvez alin sira balu, jovem sira gosta halai motor ne'e perigo tebes ba sira-nia vida, tanba ne'e, favor ida, tau hela atenção ba ida-ne'e.

Ida fali, ha'u hakarak questiona tebes, liuliu polícia trânsito, ne'ebé foin daudaun halo atuação ida iha direção ne'ebé ida mak ne'e ha'u ladún a par, mas ha'u haree iha mídia, ita sente arrepende tebes, polícia ida, alin mane oan ida que parece nia halo falha ruma mas la iha buat ida, pelo menos sira bolu ba para depois investiga, labele baku iha estrada pública, baku ida aat liu tiha fali. Ne'ebe, favor ida husu ba Ministro do Interior atu tau hela atenção ba assunto ida-ne'e. Polícia ida vandalismo hanesan ne'e, favor ida, se bele karik, bolu para depois bele hanorin di'ak, comando bele tau atenção, tanba ne'e la'ós atitude polícia ida di'ak, mas ne'e polícia ida vandalismo, hatudu nafatin iha instituição ida hanesan ne'e perigo tebes.

Obrigado.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, distinto Deputado Dário Madeira.

Faz favor.

Sr. **Dário Madeira** (FRETILIN): — Obrigado ba Presidente em exercício, composição da Mesa, Sr. Vice-Ministro, distintas e distintos Deputados hotu no povo rona-na'in tomak.

Di'ak, ba dadeer ida-ne'e ha'u hakarak atu ko'alia assunto ida kona-ba polícia trânsito ne'ebé baku jovem ida iha Município Viqueque.

Hanesan Deputado, ha'u condena tebetebes atuação membro PNTL (Polícia Nacional de Timor-Leste) ida-ne'e nian. Iha fatin ne'e duni ha'u hakarak husu ba Comandante Município Viqueque, Comando-Geral PNTL no Ministério do Interior atu colabora ho família vítima atu processa pessoal sira-ne'ebé halo crime hasoru jovem ne'e.

Bainhira ita colabora ho vítima, processa membro polícia sira-nia atitude hanesan ne'e, mak ita sei ajuda atu lori PNTL ne'e sai di'ak liu para bele protege povo, bele compreende no executa lei no ordem ne'e ho loloos.

Jovem ida-ne'ebé sira baku ne'e la'ós criminoso ida, nia funcionário público iha Ministério da Agricultura hanesan mecânico ba trator. Nia moras mental, ne'e kona desde tinan 2020. Iha altura sira quando baku, nia atu mai nia serbisu-fatin no nia la hatene atu bá pára iha-ne'ebé, de repente mosu fali iha PNTL município. Nia mai ko'alia halimar dehan: «Serbisu quando hanesan ne'e, mangame sunu tiha de'it», liafuan ida-ne'e mak sai husi niaibun-laran. Depois polícia seluk começa ko'alia: «Ó atu sunu polícia ka?», depois nia começa arrepende.

Como nia ho nia motor halai, então polícia sira duni tuir, bá kaer no baku ida halo ita triste loos, até nia monu tiha mós sei baku tan. Hahalok ida hanesan ne'e hahalok *milisi* nian, la'ós polícia nian. *Milisi* sira uluk halo ida-ne'e tem que sai experiência ba PNTL para labele halo tan hahalok ida

hanesan *milisi* ne'e, polícia tem que cumpre lei no ordem. Ação crime bele acontece, polícia labele atua ho crime, ida-ne'e sala!

Segundo, ha'u secunda ami-nia declaração, Bancada FRETILIN nian. Triste tebes, assunto saúde ne'e grave tebes duni ona iha País ida-ne'e.

Semana ida liubá acontece iha Posto Administrativo Uatulári, bainhira Jornalista TVTL bá confirma iha posto saúde ida kona-ba ai-moruk, iha posto saúde ne'e ai-moruk hotu-hotu la iha duni. Enfermeiro ne'ebé serviço iha fatin ne'e dehan katak «Na'i hira to'o mai bele haree direta, ami-nia ai-moruk la iha duni».

Bainhira notícia ne'e TVTL hatún, chefe de saúde sira começa fó fali pressão ba enfermeiro ne'ebé serviço iha fatin refere, dehan: «Nu'usá mak ó autoriza TVTL bá halo fali cobertura?». E, até ameaça: «Ó mangame, ó-nia avaliação desempenho agora ne'e ha'u fó insuficiente!».

Chefe sira hanesan ne'e merece ka? Chefe sira hanesan ne'e ita husik para sira continua halo sira-nia serbisu? Ne'e Chefe Saúde Posto Uatulári, halo hahalok ida hanesan ne'e. Ita la'ós moris iha tempo Indonésia nian para ita halo fali perseguição ba malu. E, ne'e la'ós acontece iha Uatulári de'it, quase iha fatin barak acontece.

Agora ne'e daudauk *viral*, Hospital Siloam Jakarta ne'e começa hapára tan tiha ona ita-nia paciente sira-ne'ebé atu transporta ba iha-ne'ebá.

Iha semana rua liubá paciente balu husi ne'ebá mak mai atu halo naruk ninia visa, antes fila husi ne'e ninia sasán sira iha hotel ema hasai no tau hotu de'it iha li'ur.

Sr.^a Ministra ne'e hatene resolve problema ka lae? Problema ida ema hotu questiona ne'e la'ós problema indivíduo, la'ós problema Bancada FRETILIN ka, CNRT ka, KHUNTO ka qualquer bancada ida nian, ne'e problema povo nian, tanba ne'e mak Deputado sira iha-ne'e levanta problema hirak hanesan ne'e. Sr.^a Ministra tem que loke matan para bele resolve problema hirak ne'e. Problema ne'e sempre repete, repete hela de'it ne'e? Tinan rua ho balun la iha solução ba ai-moruk, la iha mós solução ba hospital sira.

Hospital Malásia ema taka tiha ona, agora Indonésia nian tan ema lori ita ba Tribunal, tanba saida mak ita lakohi selu?

Triste, triste ba povo tomak ne'e, mate loroloron hanesan ne'e mak ita dehan «la'ós tanba ai-moruk la iha, mas ema ne'e mate tanba nia destino duni», coitado! Mas, la iha buat ida, povo tem que enfrenta situação ida-ne'e.

Obrigado.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Antes de continua, ha'u fó ponto de ordem ba distinta Deputada Cedelízia Faria dos Santos.

Faz favor.

Sr.^a **Cedelízia Faria dos Santos** (CNRT): — Muito obrigada, Sr.^a Presidente.

Ha'u hakarak fó-hanoin lailais de'it tanba horisehik ita acompanha ita-nia maluk ho deficiência ida-ne'ebé lakon nia vida, eletricidade choque ne'e.

Excelência Vice-Ministro, favor ida tau atenção hela ba questão sira-ne'e, se bele karik. Ami foti beibeik ona iha Plenária, ita-nia maluk sira-ne'ebé moras, deficiente mental ne'e, se bele, tau ona sira iha fatin ne'ebé seguro, selae hanesan horisehik ne'e, coitado, feto ida tan, nia sa'e to'o ba iha besi-riin eletricidade nian, eletricidade choque nia no nia lakon vida. Sira mós timoroan, ne'ebe favor ida, questão sira ami foti iha Plenária ne'e husu ba Ministério da Saúde no MSSI (Ministério da Solidariedade Social e Inclusão) atu tau lailais atenção ba questão urgente ida-ne'e. Ita lakohi sira sai tan vítima ba buat hirak ne'ebé sira la hatene, impacto husi, *bahasa* karik dehan, ita-nia *kelalaian* uitoan. Tanba tau sira iha fatin la seguro, sira tem que lakon sira-nia vida.

Mak ne'e de'it, Excelência Presidente.

Muito obrigada.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

A seguir, ponto de ordem, Sr. Deputado José da Cruz.

Faz favor.

Sr. **José da Cruz** (FRETILIN): — Obrigado, Presidente em exercício.

Atu dehan de'it katak estrada iha Maliana ne'e constrói husi companhia *Hutama Karya*, la'ós *Waskita Karya*.

Situação ida-ne'e ami foti iha-ne'e tinan ida resin ona, repete hela de'it. Kala Sr. Vice-Ministro mak la consegue transmite buat ne'e ba to'o iha Sr. Ministro das Obras Públicas atubele haree no fó chamada atenção urgente ba Companhia refere. Maibé, obrigado ba Sr. Deputado Virgílio, bele bá Bobonaro para bele foti caso estrada Maliana nian ne'e iha-ne'e.

Ha'u hanoin, kona-ba estrada ida-ne'e ami Bobonaro oan kala foti iha-ne'e hadau malu de'it karik.

Ha'u hanoin, mak ne'e de'it.

Obrigado barak.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, ponto de ordem husi distinto Deputado Gabriel Soares.

Faça favor.

Sr. **Gabriel Soares** (CNRT): — Obrigado, Sr.^a Presidente.

Bom dia ba hotu-hotu.

Ha'u foti ponto de ordem tanba hanesan Timor nia oan, horikalan ha'u acompanha – kala hotu-hotu acompanha – kona-ba *boxing* Timor-Leste El Matador, Timor oan na'in-rua, Daniel ho Délio, foti tebetebes Timor nia naran morin iha mundo internacional tanba *tinju* ne'e iha Indonésia, loos ka lae?

Ne'ebe, parabéns ba Timor nia oan, parabéns ba Rai Lafaek, Rai Timor-Leste, no ita deseja katak ita-nia alin sira, Timor nia oan sira, ho daudauk *boxing* ne'ebé sira na'in-rua hala'o, fó resultado di'ak, bele mós hamorin Timor nia naran. Ida-ne'e di'ak tebetebes.

E ida mós atu fó-hatene hela ba Excelência Vice-Ministro, em relação ho assunto ida-ne'ebé ha'u-nia colega Deputado ida foti, kona-ba cobrança ilegal iha EBC Haubá, ami iha informação, katak precisa atu halo investigação didi'ak tanba informação talvez Deputado iha direito atu foti assunto saida, maibé fatos mós hatudu katak informação ne'e la loos. Ami iha evidências ne'ebé ami simu husi superintendente sira kona-ba resultado ne'ebé Senhor Deputado foti iha-ne'e. Kona-ba cobrança ilegal husi Diretor EBC Haubá, ida-ne'e la loos tanba ami iha relatório ne'ebé mai husi superintendente sira.

Obrigado.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, intervenção husi distinto Deputado Domingos Augusto.

Faz favor.

Sr. **Domingos Augusto «Deker»** (CNRT): — Obrigado ba oportunidade.

Ha'u-nia respeito ba Sua Excelência Presidente do Parlamento Nacional em exercício, membros da Mesa, Sr. Deputado no Sr.^a Deputada sira, Sr. Vice-Ministro dos Assuntos Parlamentares, povo do ben rona-na'in iha território nacional.

Iha ha'u-nia biban ida-ne'e, primeiro, ha'u hakarak hato'o agradecimento ba IX Governo Constitucional, liuliu ba Sua Excelência Primeiro-Ministro ho Ministro das Obras Públicas, ne'ebé consegue visita ona Ermera hodi haree rasik condição estrada iha município refere. Agradece tebes ba atenção ida-ne'e.

Segundo, relaciona ho visita Sua Excelência Primeiro-Ministro ho Sr. Ministro das Obras Públicas nian ba Ermera, com certeza que estrada município ne'e tama iha plano, tanba ne'e, hanesan representante povo, husu ba comunidade tomak iha Município Ermera, liuliu ba juventude, atu coopera ba plano construção estrada liuhosi programa ne'ebé IX Governo Constitucional define. Ita-nia contribuição ne'e importante, e husu mós ba juventude, organização sira iha Município Ermera, Ita-Boot sira-nia preocupação ne'e pertinente, ita bele considera, maibé favor ida, coloca ita-nia

liafuan atu labele monu demais ba consumo intenção ka hanoin sira-ne'ebé la merece duni atu Ita-Boot sira hato'o, nune'e bele respeita nafatin ita-nia líder sira.

Ne'ebe, ha'u hanoin, iha biban ne'e mak ne'e de'it.

Ba atenção, obrigado.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, Deputado Florentino Ximenes «Sinarai».

Faz favor.

Sr. **Florentino Ximenes da Costa «Sinarai»** (FRETILIN): — Obrigado, Presidente em exercício, componente da Mesa, Sr. Vice-Ministro no Camarada Buibere no Maubere sira hotu.

Dadeer-saan ida-ne'e ha'u hakarak atu hatete katak iha dia 7, horibainrua, iha MSSI (Ministério da Solidariedade Social e Inclusão) mosu tan fenómeno di'ak ida, mak ministério ida-ne'e fó posse ba cargo chefia hamutuk 140 pessoas.

Vice-Ministro, husu ninia explicação! Ho funcionário total território MSSI nian iha de'it 518 pessoas, cargo chefia ne'e atu lidera manduku ka, Sr. Vice-Ministro? Ha'u triste tebes.

Iha dadeer-saan ida-ne'e ha'u mós hakarak atu hatete ba povo tomak katak nem iha artigo ida ka decreto ida fó competência ba negociador fronteira marítima hodi fahe mina husi *Greater Sunrise* 20% ka 30% hodi dada ba Austrália ka mai Timor-Leste, Sr. Vice-Ministro.

Mas, ne'e hatudu katak liderança negociador la iha duni capacidade atu resolve assunto hirak ne'e, maibé ho intenção atu fahe duni rico-soin ba Austrália, Vice-Ministro. Depois, fila mai bosok povo ida-ne'e hodi dehan: «Ita manán tiha fronteira Marítima», ainda pior, obriga Parlamento Nacional atu aprova, ho matan delek, buat hirak-ne'e hotu, Sr. Vice-Ministro. Tanba ne'e FRETILIN vota contra duni resolução hirak-ne'e tanba mina ho gás *Greater Sunrise* nian buti hamutuk fali ho fronteira marítima tanba fronteira marítima ne'e la'ós negociador ida nia vontade mak halo fali demarcação, maibé tuir direito internacional ne'ebé Constituição RDTL mós hakerek tiha ona iha artigo 4.º, Sr. Vice-Ministro. Tanba ne'e ha'u sempre hatete katak CNRT gosta mak halo *pembodohan publik*, no nanál mós ruin la iha, hodi mai dehan FRETILIN mak traidor. Gosta bosok povo ida-ne'e.

Molok atu remata ha'u-nia intervenção ida-ne'e, husu hela ba Sr. Vice-Ministro dos Assuntos Parlamentares: Lei ida-ne'ebé mak fó competência ba negociador fronteira marítima atu fahe rico-soin Timor-Leste nian ba Austrália?

Sr. Vice-Ministro, hanesan semana-semana ha'u hatete ona, katak IX Governo ida-ne'e la iha liu capacidade governativa, tanba ne'e duni mak hahú kedas iha ukun Governo nian iha 2023 mai

desmantela tiha kedas necessidade básica povo ida-ne'e nian, hanesan saúde, agricultura, no mós foos nia folin sa'e ba beibeik, Sr. Vice-Ministro.

Secunda declaração Bancada FRETILIN nian hodi dehan, semana-semana ami la baruk atu ko'alia no continua haka'as an nafatin tanba Timor-Leste, ho IX Governo nia ukun, atu tama ona ba rai-naruk, Sr. Vice-Ministro.

Ita-Boot hatene ka lae, Sr. Vice-Ministro, declaração ida mai husi dirigente Hospital Nacional Guido Valadares, katak ema mate iha hospital liu ona estandardização *WHO* (*World Health Organization*) nian, maibé Sr. Primeiro-Ministro sei continua calma hela. Se iha mundo seluk, se iha país seluk, dirigente ida hanesan saúde ne'e mak fó declaração ho vontade, loloos Primeiro-Ministro resigna an tiha ona tanba la iha duni capacidade, Sr. Vice-Ministro.

Ha'u hakarak atu secunda declaração ida-ne'ebé mai husi distinto Deputado Dário. Sr. Vice-Ministro, tem que halo investigação ida kle'an ba polícia criminoso sira iha Viqueque tanba baku fali ema moras mental ida. Maibé, ema ne'e mós di'ak, ema ne'e funcionário ida. Cuidado ho ita-nia polícia sira-ne'ebé sempre usa farda hodi halo discriminação ba ita-nia povo ida-ne'e.

Hakarak aproveita atu hatete, vítima ne'e naran Lourenço Gusmão, nia data moris dia 14 de agosto de 1979, ho idade 45 anos, nia *status* kaben-na'in, nia profissão hanesan funcionário público, Sr. Vice-Ministro, tanba ne'e ha'u hakarak atu reforça no halo duni investigação ba polícia criminoso hirak ne'ebé gosta usa farda hodi halo atuação ida desumano ba ita-nia povo sira iha Viqueque.

Obrigado barak, Sr. Vice-Ministro e Sr.^a Presidente do Parlamento em exercício.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, ponto de ordem husi distinto Deputado Luís Roberto.

Faz favor.

Sr. **Luís Roberto da Silva** (KHUNTO): — Bom dia, Presidente.

Ha'u atu halo intervenção, karik bele, fó ha'u halo intervenção de'it.

Sr.^a **Presidente** (Maria Terezinha da Silva Viegas): — Fica para último, Sr. Deputado, tanba ohin ha'u taka tiha ona inscrição.

A seguir, distinto Deputado Francisco Ikulay da Costa.

Faz favor.

Sr. **Francisco da Costa «Ikulay»** (CNRT): — Obrigado barak, Presidente em exercício, Vice-Ministro dos Assuntos Parlamentares no Na'i Deputado sira.

Ha'u-nia bom dia ba Ita-Boot sira.

Acompanha Deputado sira-nia intervenção, triste tebes. Ita hetan oportunidade, ita mai loko an no gaba an liu fali figura central sira.

Povo Timor-Leste ne'e sasin ne'e wa'in ba wa'in, katak figura timoroan ne'ebé sempre iha Plenária baibain ita halo ataque, mas ita sukat fali ita-nia an ba Maun Xanana atu halo negociação fronteira marítima, ne'e ha'u fó coitado ba pessoal, *kasian* ba Ita-Boot, ha'u dehan coitado ba Ita-Boot.

Ha'u respeita Ita-Boot nia lian nu'udar representante povo, mas sukat mós ita-nia capacidade ho pessoal ida Xanana ne'e, líder sira seluk hotu ó respeita.

Primeiro, ha'u hakarak sekunda declaração Presidente Comissão C nian, liuliu ba eletricidade, precisa, tem que hadi'a duni! E, ha'u bele dehan katak ha'u gosta la halimar, lakohi defende buat ne'ebé sala, rona hotu-hotu nia lian no respeita hotu-hotu nia lian, mas lian ida-ne'ebé povo mós rona no assiste hela, katak sira mós sei halo julgamento iha momento ida.

Atu hatete ba público, acontecimento ida iha Parlamento Nacional ne'e pessoal ka assessor balu, ha'u la hatene, tuku 9 kalan mak mai fali iha Parlamento Nacional ne'e hodi halo serbisu, depois choque no estraga carreta Estado nian. Ha'u husu ba Presidente no Mesa Parlamento tem que hato'o ba pessoal ne'e, tem que iha responsabilidade to'o carreta ne'e di'ak fali tanba ne'e carreta Estado nian. Pessoal ida mai hetan ona privilégio, maski nia contribui duni, mas nia mós hetan privilégio ona, depois kala lanu mak sai tiha hanesan ne'e.

Segundo, ha'u hakarak hato'o ba ha'u-nia dirigente, ukun-na'in sira, liuliu motorista sira-ne'ebé usa Estado nia sasán, tem que respeita sinal trânsito, labele dehan, ita hetan oportunidade ona, fó fiar, depois ita lori líder, ukun-na'in sira-nia carreta, ita naran bá pára arbiru de'it iha qualquer fatin, ne'e labele! Ha'u bele dehan, condutor ka motorista ne'e sala, Sr. ministro no secretário de Estado sira precisa fó atenção bá! Ha'u ko'alia hanesan ne'e tanba iha Uma-Fukun ida-ne'e mós halo lei.

Dala ida, quando bá Baucau, visita ida, depois nia pára la'ós iha esquerda, pára duni iha direita, depois ami baucau-oan sira-ne'ebé representa mak sai fali rona lia, ami mak sala.

Colega sira, ha'u hato'o iha Plenária ida-ne'e, bainhira ita bá visita eleitor sira, ita mós tem que hatudu katak ita mak halo lei duni, ita mós tem que obedece lei no ita tem que respeita sinal trânsito sira.

Colega sira, dala barak iha acontecimento iha território ida-ne'e, iha Plenária loron ohin ha'u hakarak hato'o ha'u-nia parabéns ba organização sira-ne'ebé existe iha Timor ne'e. Ha'u respeita Ita-Boot sira tanba Ita-Boot sira bele harii organização iha território ida-ne'e, mas, favor boot ida, tem que controla, tem que respeita malu, hadomi malu hanesan timoroan, respeita malu hanesan timoroan! Tanba dala barak ita usa atributo hanesan *PSHT*, *Kera Sakti*, *Padjajaran*, *Taekwondo* no *KORKA* nian. Imi ne'e mesak timoroan, organização mak iha diferença mas ita mesak timoroan, ita tem que

respeita malu, imi tem que hadomi malu. Imi mós iha dever atu contribui ba paz no dame iha rai ida naran Timor-Leste, RDTL ida-ne'e.

Ikusliu, Presidente, dala barak polícia sira-ne'e ita sempre fó sala, mas ita mós tem que tama ho cuidado tanba dala barak ita-nia intervenção ne'e hanesan fó vantagem ba sira para sira mós sei la respeita malu, sira mós lakohi respeita ita, Parlamento Nacional, Deputado no ukun-na'in sira. Tanba ita defende demais, ameaça Estado mós dehan buat loos, desrespeita Estado mós ita dehan loos. Ita tem que defende ida-ne'ebé loos no lógica.

Ha'u hanoin, tempo hotu ona.

Obrigado, Sr.^a Presidente.

Sr.^a **Presidente** (Maria Terezinha da Silva Viegas): — Obrigada.

A seguir, ponto de ordem husi distinto Deputado António da Conceição.

Faz favor.

Sr. **António da Conceição «Kaloan»** (PD): — Sr.^a Presidente, ha'u husu ponto de ordem atu halo defesa ida lai ba Sr. Primeiro-Ministro nia pessoa.

Ha'u husu atu ita tem que haketak atos governativos ho pessoa entidade ida nian.

Ha'u ladún concorda ho linguagem ida-ne'ebé ohin expressa husi declaração Bancada FRETILIN nian, ne'ebé temi «Sr. Primeiro-Ministro protege estimada».

Linguagem sira hanesan ne'e linguagem de difamação ba entidade pública ida. Ita nunca bele classifica buat sira romantismo iha atos governativos, ne'e la di'ak! Ita la educa ita-nia sociedade atu hatene saida mak ética iha ita-nia conversa sira, tanba ne'e ha'u husu atu ita tetu didi'ak ita-nia liafuan. Por mais ita sente dehan buat ne'e la di'ak, mas iha termos próprios atu ita usa, quanto mais iha Uma-Fukun ida hanesan ne'e, ne'ebé transmissão ne'e direta.

Ha'u husu ho respeito atu ita hotu-hotu tem que iha ética de comunicação, haketak sentimentos pessoais ho atos governativos para nune'e ita bele iha maturidade, iha responsabilidade iha ita-nia ukun.

Segundo ponto, ha'u...

Presidente fó sinal katak Sr. Deputado ne'e nia tempo hotu ona.

... Sr.^a Presidente, ha'u bele empresta tan minuto ida de'it? Ha'u husu desculpa, hotu tiha ona.

Sr.^a **Presidente** (Maria Terezinha da Silva Viegas): — Faça favor, mais um minuto, Deputado.

Sr. **António da Conceição «Kalohan»** (PLP): — Segundo, ha'u mós hakarak atu dehan buat importante ida, ita iha hela situação ida dilemática ba Timor quando ita ko'alia de'it precipício fiscal em relação ao interesse nacional e ida-ne'e ita ko'alia kona-ba *Greater Sunrise*.

Ha'u só hakarak clarifica hanesan governante ida mós iha VII Governo nian, assinatura do Acordo da Fronteira Marítima com consentimento do VII Governo ho nia visto para depois atu assina iha Nova Iorque e ha'u, natoon ne'e, Ministro do VII Governo nian mós, ne'ebe, ami hotu hatene parte integrante do acordo ida-ne'e mós ligado ba saída... Quanto mais ita foti problema sira-ne'e boot, ita loke espaço político ne'e atu ema seluk explora ita-nia situação rai-laran nian, ne'ebé sei la convence ema seluk atu halo ninia investimento tan mai iha Timor.

Ne'ebe, ha'u husu atu ita tetu didi'ak ita-nia liafuan sira. Hamutuk, defende interesse nacional! Por mais diferença política ita bele iha, mas interesse nacional ne'e ita hotu-hotu nian.

Obrigado, Sr.^a Presidente.

Sr.^a **Presidente** (Maria Terezinha da Silva Viegas): — Muito obrigada, distinto Deputado. Ainda temos três pontos de ordem.

A seguir, distinto Deputado Dário Madeira, um minuto!

Faz favor.

Sr. **Dário Madeira** (FRETILIN): — Di'ak, obrigado.

Ko'alia lailais de'it.

Ba Deputado ida nia intervenção ne'ebé foin daudauk ko'alia katak ema ameaça Estado, ema ne'e indivíduo. Indivíduo ne'e halo crime, atuação tuir lei no ordem, la'ós ema ida-ne'ebé povo fó fiar atu garante lei no ordem, nia tama fali ho atuação ida ho crime, tanba ne'e mak ha'u nafatin ko'alia katak hahalok ida-ne'e hahalok uluk *milisi* sira mak halo ida-ne'e.

Milisi sira uluk halo tem que sai experiência ba luto Nação nian ida agora para labele repete hahalok *milisi* nian ne'e. Ita ukun an. Tuku-tebe, monu tiha mós sei baku ne'e saída? Ne'e desumano! Ema ne'e la iha sentimento, será que polícia Viqueque la conhece ema ida sira baku ne'e?

Nia funcionário público ne'e, nia moras mental, até nia ko'alia de'it la hatene. Nia quando la'o la fila ona família sempre buka.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, ponto de ordem husi distinto Deputado Gabriel Soares.

Um minuto!

Sr. **Gabriel Soares** (CNRT): — Obrigado, Presidente e Vice-Ministro.

Em princípio, ha'u lamenta tebetebes ho colega ida ohin hatete katak «Bancada CNRT iha V Legislatura ne'e matan-delek». Ha'u atu hatete, talvez matan-delek ne'e filafali ba ida-ne'ebé ohin halo intervenção ne'e.

CNRT ho PD iha momento ne'ebá, ho tan Bancada sira seluk, fó voto maioria ba apresentação kona-ba negociação fronteira marítima iha-ne'e tanba defende soberania do Estado. Hanesan mós uluk iha 1999 ita defende soberania do Estado, ita vota ba ukun-rasik an, ida-ne'e mós hanesan, atu vota ba Timor nia ukun-rasik an total e completo. Ne'ebe, CNRT la matan dele, CNRT hatene vota ba sentido de Estado e soberania do Estado, independência total e completa, ne'ebe matan dele ne'e parece filafali ba ida-ne'ebé ohin ko'alia.

Obrigado.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, ponto de ordem, distinta Deputada Helena Martins.

Faz favor.

Sr.^a **Helena Martins** (FRETILIN): — Obrigada ba oportunidade.

Ha'u atu hatete de'it katak ami FRETILIN la precisa atu ema hanorin ética mai ami, ami hatene nanis ética ne'e saida, moral ne'e saida.

Atu explica de'it katak «estimada» ne'e la'ós liafuan insulto, ida-ne'e liafuan ne'ebé mais apropriado atu ita ko'alia, tanba ne'e la iha liafuan ruma ne'ebé ami halo ho insulto ba liderança ruma. Ne'ebe, Ita-Boot sira la precisa mai fali hanorin ética ba FRETILIN.

Ida-ne'e de'it mak ha'u hakarak atu clarifica.

Obrigada, Presidente.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

Tuirmai, ponto de ordem, distinta Deputada Olinda Guterres.

Faz favor.

Sr.^a **Olinda Guterres** (KHUNTO): — Bom dia ba Sr.^a Presidente interina, Secretária da Mesa no colega Deputado sira.

Ha'u halo ponto de ordem ne'e hanesan sentimento ida-ne'ebé choque ita nu'udar feto. Ita iha-ne'e 65, Ita-Boot sira hotu-hotu matenek, mas ba ha'u, ha'u hakerek ha'u-nia naran, lê ha'u-nia naran ha'u hatene, português ha'u la hatene barak, mas musan ida ha'u hatene. Liafuan «estimada» ne'e ita ko'alia ba iha uma-laran, estima ita-nia oan, estima ita-nia bei-oan, estima ita-nia la'en no estima ita-

nia feen, maibé liafuan ne'e quando mosu iha-ne'e, katak «Sr.^a Ministra Sr. Primeiro-Ministro Kay Rala Xanana Gusmão nia estimada», ne'e, ita bele hatete, monu ba buat seluk ona...

Estrondo.

... Imi bele nonook tiha para ha'u ko'alia, sala ba mak imi corrige, ita ko'alia imi haa hii iha-ne'e, nonook tiha para ha'u ko'alia!...

Sr.^a **Presidente** (Maria Terezinha da Silva Viegas): — Um minuto, distinta Deputada.

Sr.^a **Olinda Guterres** (KHUNTO): — ... Hein lai!

Ha'u mós vota ba Ita-Boot sira, nu'usá mak ha'u labele defende?...

Sr.^a **Presidente** (Maria Terezinha da Silva Viegas): — Ponto de ordem um minuto, Sr.^a Deputada.

Sr.^a **Olinda Guterres** (KHUNTO): — ... Di'ak.

Obrigada.

Sr.^a **Presidente** (Maria Terezinha da Silva Viegas): — A seguir, ponto de ordem, Sr. Francisco da Costa Ikulay.

Sr. **Francisco da Costa «Ikulay»** (CNRT): — Obrigado.

Ha'u hakarak hato'o de'it ba colega balu, quando hakarak foti ema nia lian ne'e tem que ho cuidado.

Ha'u-nia liafuan ne'e sei fresco hela iha ha'u-nia kakutak, katak polícia, ba qualquer pessoa ne'ebé halo ameaça ba Estado ne'e tiro mate mós di'ak.

Ha'u la hatete iha Viqueque mak acontece ka, iha-ne'ebé de'it, ha'u la hatene ida-ne'e, rona ha'u-nia intervenção ne'e mak ita ko'alia. Qualquer sé mak halo ataques ba Estado, ameaça Estado, tiro mate mós la iha buat ida. Ha'u la hatete acontece iha Viqueque ka, iha Lospalos ka, ha'u la hatete ida-ne'e, ne'e só Ita-Boot mak hatete. Favor ida rona ema nia intervenção ne'e mak foin hatán.

Obrigado barak.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, iha ponto de ordem, maibé iha mós inscrição, de maneira que ha'u husik ba inscrição de'it ba distinto Deputado Bianco.

Temos mais de um ponto de ordem.

Distinto Deputado José Virgílio.

Faz favor.

Sr. José Virgílio R. Ferreira (CNRT): — Di'ak, obrigado ba tempo.

Ha'u-nia respeito ba Sr.^a Presidente no componente da Mesa, Sr. Vice-Ministro dos Assuntos Parlamentares no distinto e distinta Deputado sira.

Ha'u haree, declaração ho intervenção husi Sr. Deputado Felix... Ha'u bolu nia Felix tanba uluk ami iha *My Friend* ne'ebá ami bolu Mau Fei, la'ós Sinarai, Sinarai, nia aman ne'e, ha'u respeita. Deputado la iha-ne'e, Mau Fei ne'e, ne'ebe ko'alia ne'e sukat ibun, Mau Fei! Ita idade hanesan hela sa. Hatete ba nia, ninia declaração ne'e insulta, insulta Maun Boot Xanana. Mas, la iha buat ida.

Ohin Deputada dehan: «Imi labele hanorin FRETILIN», sim, FRETILIN ne'e kala matenek liu, boot liu, mak ohin loron ita ko'alia Maun Xanana, maibé, ohin Maun Xanana mak tau hela Ita-Boot sira iha-ne'e mak hodi Ita-Boot sira tebe-rai ne'e. Habit hela iha Maun Xanana nia kalilin, ohin loron fó oportunidade para imi hatete Maun Xanana hanesan ne'e, ne'e crime!

FRETILIN ida uluk ne'e ita hotu nian, agora ne'e FRETILIN partido. Ita hakarak ko'alia loloos ne'e hanesan ne'e.

Sr.^a Presidente (Maria Terezinha da Silva Viegas): — Muito obrigada, distinto Deputado.

Tuirmai, ponto de ordem husi distinto Deputado David Mandati Ximenes.

Sr. David Dias Ximenes «Mandati» (FRETILIN): — Obrigado, Presidente.

Ita gosta generaliza sasán, ida-ne'e mak sai hanesan ne'e.

Quando ita temi ema, ema ne'e iha situação ida, ohin loron situação seluk, labele lori fali mahon para haneha, ne'e labele! Ne'e la iha! Ne'e la iha! Labele lori fali naran ne'e para haneha! Ema ida la iha ema seluk nia kalilin okos, la iha ida!

Obrigado.

Sr.^a Presidente (Maria Terezinha da Silva Viegas): — Muito obrigada, distinto Deputado.

A seguir, distinta Deputada Maria Angélica Rangel, ponto de ordem.

Um minuto! Se faz favor.

Sr.^a **Maria Angélica Rangel da C. dos Reis** (FRETILIN): — Ha'u husu defesa de honra ba liafuan FRETILIN, Sr.^a Presidente, três minutos.

Sr. Deputado ida ohin dehan katak «FRETILIN ida uluk oin seluk, FRETILIN agora oin seluk», FRETILIN husi uluk 1974 hanesan to'o agora. Ita-Boot labele dehan katak «subar iha Xanana nia kalilin okos», FRETILIN nunca subar iha Xanana nia kalilin okos. FRETILIN iha mak naran herói ida boot Xanana ne'e iha, ne'ebe, lalika nega história ida, Sr. Deputado Virgílio!

Ita-Boot iha problema ho Deputado Sinarai, favor, Ita-Boot na'in-rua ko'alia iha Ita-Boot na'in-rua nia fatin, la'ós mai dehan, «FRETILIN iha ema que iha Xanana nia kalilin okos», la iha! FRETILIN uluk to'o agora FRETILIN nafatin hanesan.

Muito bem, Ita-Boot sira dehan katak Ita-Boot sira FRETILIN, maibé tanba democracia ne'e FRETILIN mak hanorin, ohin loron Ita-Boot sira ba partido seluk. Maibé Ita-Boot sira defende buat ne'ebé sala ne'e, la loos ida.

Ami nunca ko'alia iha kotuk. Sr. Primeiro-Ministro quando mai iha-ne'e mós ami ko'alia iha nia oin, dala ruma nia reconhece...

Sr.^a **Presidente** (Maria Terezinha da Silva Viegas): — Muito obrigada, distinta Deputada.

Sr.^a **Maria Angélica Rangel da C. dos Reis** (FRETILIN): — ... Ne'ebe, labele dehan iha ema ida iha Xanana nia kalilin okos, la iha!

Sr.^a **Presidente** (Maria Terezinha da Silva Viegas): — A seguir, ponto de ordem, distinto Deputado Natalino dos Santos.

Faz favor.

Sr. **Natalino dos Santos Nascimento** (CNRT): — Sim, obrigado.

Ha'u hakarak halo defesa de honra.

Sr.^a Presidente, ha'u haree colega sira ko'alia kona-ba *Greater Sunrise*, la compreende saida mak *Greater Sunrise*, ko'alia kona-ba negociação, la compreende saida mak negociação.

VII Governo mak atribui competência ba negociador atu bá halo negociação. Negociação ne'e opta opção rua: opção ida dehan 20 e 80 dada mai Timor, 30 e 70 dada ba Austrália, ne'e opção, la'ós Sr. Primeiro-Ministro ka negociador mak bá fahe. Iha negociação ne'e dada ba Austrália ka dada mai Timor, tanba ne'e mak Governo fó competência ba negociador Kay Rala Xanana Gusmão, nu'udár timoroan ida, líder ida, atu bá halo negociação.

Agora, se dehan negociação ne'e la bá halo sasán sira-ne'e, então bá halo saida? La'ós bá fahe, iha opção. Ita rasik la compreende. VII Governo sé mak lidera?...

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Sr. **Natalino dos Santos Nascimento** (CNRT): — ...Podia fó, atribui competência ba negociador hodi halo missão ida-ne'e. Tanba ne'e atu ko'alia tem que compreende, inteira sasán sira-ne'e, selae ema dehan ita *asbun* (*asal bunyi*).

Obrigado.

Sr.^a **Presidente** (Maria Terezinha da Silva Viegas): — Sei iha ponto de ordem, mas ha'u la loke ona tanba iha inscrito sei naruk hela.

Ho nune'e ha'u fó kedas tempo ba distinta Deputada Aliança da Conceição Araújo.

Faz favor.

Sr.^a **Aliança da Conceição Araújo** (CNRT): — Muito obrigada ba Sr.^a Presidente em exercício.

Muito bom dia ba Ita-Boot, ba Sr.^a Secretária da Mesa, ba Sr. Vice-Presidente do Parlamento Nacional, ba Deputados hotu no ba Sr. Vice-Ministro dos Assuntos Parlamentares.

Ha'u atu ko'alia uitoan sobre ohin ita-nia maluk, colega Deputado ida, hatete Maun Xanana, dehan katak ninia Governo la *mampu* ona bele dada an tiha.

Ita-Boot ha'u ladún hatene, maibé ita-nia mamá ne'e ha'u conhece, ema ida que di'ak, ema ida educada, respeitadora, ema ida que iha maneira ida hanesan inan, ha'u hatene katak educa ninia oan sira-ne'e di'ak. Ha'u la hatene Ita-Boot nia mamá mak nia duni ka keta la'ós karik tanba Ita-Boot nia maneira ne'e muito diferente ho nia. Ita-Boot nia idade ne'e mós ha'u bele hatete katak sei jovem hela, Ita-Boot labele sukat fali ita-nia idade ho Maun Boot Xanana.

Ha'u ba ona intervenção.

Dala ida tan, primeira questão ida-ne'e ha'u dirige ba Sr. Vice-Ministro. Hakarak solicita nafatin ba Governo, liuhosi ministério competente, atu tau atenção ba ita-nia herói sira-nia placa naran iha Jardim dos Heróis Metinaro – ha'u levanta dala rua tiha ona iha-ne'e ho língua portuguesa – tanba naran sira iha placa, letra sira-ne'e la moos hotu ona, dificulta tebes família sira atu ba reconhece rate wainhira bá visita no tau ai-funan.

Além de ida-ne'e, telhado iha ossuário jardim dos heróis ne'e mós condição la di'ak no quase atu monu de'it ona. Favor ida, ministério competente bele haree ba assunto ne'e, tanba importante tebes atu cria condições no fatin ne'ebé digno ba ita-nia herói sira.

Segundo, ita-nia Rate Santa Cruz, du'ut aas no ema la bá hamoos, ema só halo limpeza de'it ba rate sira iha oin, tanba ne'e mak rate sira husi oin ne'e moos hela, du'ut naruk ne'e husi kotuk, abandonado hela, hodi dificulta ema sira-ne'ebé bá visita rate. Uluk sira hamoos, tau atenção, mas agora du'ut naruk.

Terceiro, ha'u reforça ami-nia Presidente Comissão C, levanta ona kona-ba eletricidade ne'ebé mate beibeik, hodi dificulta atendimento no mós serviço iha território.

Iha quarta-feira liubá Comissão C bá halo visita fiscalização iha Ministério das Finanças. Infelizmente, iha momento ne'ebá ahi mate no sira serbisu usa de'it gerador, maibé ladún di'ak tanba gerador ne'e capacidade la to'o hodi oferece eletricidade ba parte hotu. Funcionário sira-ne'e mós lamenta katak problema ahi mate la'ós primeira vez, dala barak ona mak sira enfrenta situação ida-ne'e.

Além de ida-ne'e, problema ne'ebé hanesan acontece mós iha Aeroporto Internacional Nicolau Lobato. Iha momento ne'ebá ha'u iha assunto ida iha Aeroporto no problema eletricidade mate afeta tebetebes ba atendimento iha parte *check in* nian, *scan* sasán, inclui processo hasai foto iha imigração no mós processo foti bagagem nian. Ho condição rai-manas dificulta circulação ar iha salão laran, ida-ne'e cria imagem la di'ak, fó impressão la di'ak ba visitante sira-ne'ebé mai visita ita-nia Rain. Husu ba ministério competente atu haree mós sobre problema eletricidade mate, acontece tanba halo manutenção no troca fios, maibé, situação ida-ne'e acontece beibeik ona mas seidauk resolve ho di'ak tanba ne'e husu ba parte competente, liuliu ba Presidente EDTL (Eletricidade de Timor-Leste), atubele hadi'a condições no tau prioridade ba assunto ida-ne'e.

Mak ne'e de'it.

Obrigada barak.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

A seguir, distinto Deputado Antoninho Bianco.

Faz favor.

Sr. **Antoninho Bianco** (FRETILIN): — Obrigado.

Dala uluk agradece ba Maromak tanba ita sei moris. Dala ruma ita ko'alia ho toos, dala ruma mamar, maibé tanba ita iha-ne'e ema ho fraqueza hotu, mesak ema sala-na'in. Atu dehan, husi líder to'o mai povo simples, ita mesak sala-na'in, ne'ebe la iha ema ida super iha Rai ne'e, ita hotu mesak ema fraco.

Ha'u hanoin, primeiro de tudo tem que agradece ba aspiração povo ne'ebé ita hotu mai atu hatutan ba malu. Pelo menos declaração Bancada FRETILIN nian ne'e nu'udar aspiração povo, ne'ebe

balu ema gosta rona, balu la gosta, maibé ne'e hanesan realidade ne'ebé ita tem que foti iha Plenário ne'e para fó-hanoin ba malu.

Iha ema balu terus ka lae, ema balu susar ka lae, balu hamnasa ka, balu matan-been tun ka tanba sira enfrenta situação iha sira-nia moris, liuliu balu ne'ebé buka atu halo tratamento saúde iha fatin-fatin, ne'e mak ami sente katak tem que hato'o iha público ne'e, hein katak fanun ita atubele halo melhoramento.

Pronto, kona-ba ita-nia soberania ka la soberania, ne'e ita haree de'it tratado ne'e rasik mak ita lê. Maluk sira, se lê karik, Anexo B de'it, lalika Anexo A, lalika saida... Ita-Boot ba Anexo B de'it, artigo barabarak iha-ne'ebá. Ne'ebe ita dehan, se fronteira marítima ne'e soberania, então rico-soin sira iha laran ne'e labele halo consenso tanba ita dehan se mai Timor ita-nian 70, sira 30, se bá Austrália, ita 80 no sira 20, ne'e significa, ne'e mós sei consenso, significa soberania em questão. Maibé, la buat ida tanba buat ne'e liu tiha ona, agora ba oin ne'e saida mak *pending* ita tem que hamutuk, tanba buat ne'ebé la'o ne'e la'ós dehan ema ida mak tem que manda, tanba Austrália mós dehan «imi mesak labele», timoroan mós labele mesak tanba ita tem que buka para halo di'ak ba oin. Ne'e mak, ha'u hanoin, questão ida-ne'e ita lalika gava malu, lalika hatún malu, maibé, ha'u sente, posição ne'ebé la'o tiha ona e ha'u hanoin ita hein katak ita bele convence ita-nia maluk sira, parceria ho Austrália nia *board*, nia conjunto ne'e halo nu'usá e consórcio ne'ebé atu halo *Greater Sunrise* nia realidade ne'e, ida-ne'e mak importante. Ba ha'u, hanesan timoroan, ha'u hanoin katak la iha ema super, é tudo ita iha hanoin hamutuk atu halo ba oin.

Ha'u ko'alia barabarak ona kona-ba *Greater Sunrise*, ha'u ko'alia barabarak ona kona-ba fronteira, ha'u halo discussão barabarak, maibé importante agora ne'e oinsá mak ita sira-ne'ebé iha-ne'e ne'e tem que buka fó-hanoin ba malu e halo para convence maluk sira-ne'ebé atu halo exploração, buat ne'e atu sai saida e convence ita ho Austrália. E Austrália hatene katak ita precisa duni, então nia mós labele aproveita, tanba ita iha fraqueza ida-ne'e. Ne'ebe, ha'u hanoin, dentro de sentimento de pertença ba ita-nia Rain ne'e pró-contra ne'e buat seluk, maibé ita tem que hamutuk oinsá para convence ema seluk atubele halo tuir buat ne'ebé ita povo hotu hakarak. Ha'u hanoin, ida-ne'e.

Agora, ita dehan FRETILIN ne'e nu'usá, nu'usá, ha'u hanoin, história mak hatudu. La iha FRETILIN la iha história ne'ebé acontece tanba história mai husi FRETILIN duni. Ohin loron democracia ita bele fahe ba fatin-fatin, maibé ita hotu ne'e geração ida, democracia mak dehan ami iha fatin ne'e. Maibé obra ne'e hahú husi ita-nia herói sira, la iha tan seluk, só FRETILIN duni. FRETILIN mak iha ai-laran, la iha tan sira seluk. Ema seluk adere ba ne'e buat seluk ida, mas ohin loron democracia tanba ita tem que comunga, não é? Uluk Constituição ida ketak agora Constituição ida que tem que nune'e duni, ne'ebe democracia mak ne'e, mas FRETILIN uluk FRETILIN agora FRETILIN ba oin é sempre FRETILIN ida de'it, la iha FRETILIN seluk.

Obrigado barak.

Sé mak iha naran código, hotu-hotu ne'ebé acontece iha Rai ne'e ne'e código FRETILIN nian. Ne'e líder sira ikuikus ne'e código seluk ha'u la hatene loos, maibé ne'e hotu obra FRETILIN nian, ne'ebe labele nega ita-nia an tanba ita mai husi knuuk ida, uma lisan boot mak ne'e duni, Ramelau. La iha Ramelau karik la iha buat seluk acontece.

Herói ho mártir sira, ami haksesuk tanba ami la entende Ita-Boot sira-nia sofrimento. Ami hein katak Ita-Boot sira iha-ne'ebá ne'e reza ba ema sira iha-ne'e para labele ko'alia mak gava an, gava malu de'it maibé tem que serbisu maka'as.

Obrigado.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, distinto Deputado Armando dos Santos.

Faz favor.

Sr. **Armando dos Santos Lopes** (PD): — Di'ak, obrigado ba tempo.

Bom dia ba Presidente em exercício, composição da Mesa, distinta no distinto Deputado sira hotu, Excelência Vice-Ministro dos Assuntos Parlamentares, caros ouvintes, querido povo Timor-Leste.

Em primeiro lugar, ha'u, nu'udar lospalos-oan, agradece ba Maromak tanba fó cultura ba ami lospalos-oan sira. Lospalos-oan, quando hasai liafuan ida be bosok ka trata katuas ida ka maun boot ida, significa katak ami sei sees an husi ami-nia cultura. Ha'u bele dehan katak ita bele ko'alia kona-ba política maibé ita labele ses aan husi ita-nia cultura, tanba cultura identifica ita lospalos-oan.

Tuirmai, hakarak atu ko'alia sobre manutenção, normalização estrada sira iha município Lautém. Maibé, dahuluk, nu'udar representante do povo, ha'u hakarak hato'o obrigado wa'in ba IX Governo, ne'ebé iha política ho «comprometo» atu continua nafatin construi autoestrada atu hale'u Timor-Leste. Parte seluk, Governo nafatin mobiliza companhia sira hodi halo manutenção no normalização estrada sira-ne'ebé nia condição grave iha municípios.

Ohin ha'u hakarak ko'alia kona-ba manutenção no normalização estrada iha Município Lautém, katak iha tinan kotuk Governo halo contrato ho companhia ida ho naran Eliaaun atu tau matan ba manutenção no normalização estradas graves iha Município Lautém ho carácter multianual.

Excelência Senhor Vice-Ministro dos Assuntos Parlamentares, tuir ha'u-nia compreensão katak contrato ho carácter multianual significa Governo fó fiar ba companhia refere atu prepara no atu serbisu tinan ida tomak atu tau matan ba parte estrada sira-ne'ebé grave, hamoos estrada, aterro kuak sira, hadi'a valeta sira-ne'ebé entupido e hadi'a ponte ki'ik sira-ne'ebé aat. Maibé, seidauk remata tinan

ida tomak, condição estrada aat no grave hela iha Lospalos, companhia refere pára serbisu, iha Posto Administrativo Loré. Ha'u haree iha contrato ne'e multianual, fó ba companhia refere, depois ha'u rasik husu ba companhia ida-ne'e tansá mak nia bele pára iha tinan klaran. Maibé companhia hatete katak tanba orçamento la to'o e, ha'u hakarak hato'o ba Sua Excelência katak maski osan ne'e la to'o e nia pára iha tinan klaran, maibé companhia nia contrato ne'e sei la'o hela nafatin. Ho ida-ne'e mak ha'u husu ba Ministério das Obras Públicas atu fó razão katak companhia nia razão ne'e razoável ka lae, tanba contrato multianual. Ha'u hein resposta husi Governo atu nune'e ha'u bele hato'o ba comunidade iha Posto Administrativo Loré nian.

Excelência Vice-Ministro no distinta e distinto Deputado sira hotu, iha ocasião ida-ne'e ha'u hakarak fó-hatene katak comunidade Posto Administrativo Loré sempre halo celebração cultural coleta *meci* ka ular-tasi cada fulan-março. Iha evento ida-ne'e ema liu rihun rua, tanto husi internacional no local, ne'ebé visita ba parte Loré atu assiste evento cultural *meci* nian. Ho ida-ne'e mak ha'u hakarak husu ba Sua Excelência, se possível, bele hatete ba companhia refere oinsá bele hadi'a estrada ida-ne'e tanba estrada ida-ne'e atu determina para ita-nia população, ita-nia *visitor* internacional sira no mós local sira bele visita parte Loré iha fulan-março.

Ha'u hanoin, ida-ne'e mak ha'u hakarak hato'o e, dala ida tan, razão saida maka companhia ne'e pára atu nune'e ami bele hato'o ba população iha parte Loré nian.

Muito obrigado, Presidente.

Sr.^a **Presidente** (Maria Terezinha da Silva Viegas): — Muito obrigada.

Tuirmai, distinto Deputado Firmínio Taequi.

Faz favor.

Sr. **Firmínio Taequi** (CNRT): — Obrigado, Presidente, e bom dia ba Presidente em exercício no composição da Mesa, Deputado ho Deputada sira tomak, no mós Vice-Ministro dos Assuntos Parlamentares.

Ha'u iha assunto rua de'it. Iha informação iha semana kotuk husi mídia *Independente* espalha katak iha EBF (Escola Básica Filial) Oesilo nian la iha mesa ho cadeira e labarik sira tuur no hakerek de'it iha rai, maibé informação ne'e laloos tanba, depois de informação ne'e iha, husi superintendente ho nia inspetor sira bá kedas fatin ne'e no haree katak mesa ho cadeira ne'e iha hela, só mesa ho cadeira balu mak aat. Iha dia 6 semana kotuk ne'e husi educação RAEOA nian sira bá lori tan mesa ho cadeira ba fatin refere, ne'ebe husu ba Vice-Ministro atu hato'o hela ba Ministra da Educação atu chama atenção ba cada escola hodi hato'o informação ne'ebé loos, selae informação ne'e atu hatún ka hamonu de'it Governo nia naran. Informação ha'u simu husi superintendente no diretor educação rasik, hato'o katak informação ne'ebé husi mídia *Independente* ne'e la loos.

Ida fali, iha biban ida-ne'e mós ha'u hakarak ható'o informação kona-ba Ró *Success*, ne'ebé durante ne'e ajuda hela povo Oe-Cusse tomak. La'ós de'it povo Oe-Cusse, maibé povo Timor-Leste tomak ne'ebé bá-mai Díli Oe-Cusse, semana-semana sempre tula hela ema moras, ema mate husi Díli bá-mai Oe-Cusse, tan ne'e husu atubele tau matan bá, se bele, fó netik subsídio bá tanba sempre ajuda hela povo Oe-Cusse e povo Timor-Leste tomak.

Mais ou menos informação ne'e mak ha'u ható'o iha oportunidade ida-ne'e, ne'ebe husu ba Vice-Ministro atu toma atenção ba ró *Success* tanba durante ne'e problema ró ba Oe-Cusse la iha ona.

Ida-ne'e de'it, Presidente.

Obrigada barak.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

A seguir, distinto Deputado Óscar Lima.

Se faz favor.

Sr. **Óscar Lima** (FRETILIN): — Obrigado, Sr.^a Presidente em exercício.

Excelência Sr.^a Presidente em exercício, componentes da Mesa, ilustres Deputadas e Deputados e Sr. Vice-Ministro dos Assuntos Parlamentares, primeiro, ha'u secunda declaração Partido nian.

Segundo, iha assunto ida que ha'u hakarak ható'o apesar de ohin iha Deputada na'in-rua ko'alia tiha ona, primeiro, Deputada Cedelízia. Maibé, como ha'u simu telefone ne'e no ha'u rasik mós bá Ermera, sente kedas katak Ermera nia ahi mate ne'e fora de normal. Sr. Vice, mate ne'e to'o loron tolu haat ne'e la normal. Ita iha Díli ne'e pelo menos mate-lakan mate-lakan, mas la to'o horas ida nia lakan filafali ona, ida-ne'ebá ne'e lae, loron haat, ne'ebe, ha'u hanoin, ida-ne'e problema ida que sério. Ha'u hanoin, Ita-Boot bele haree to'ok bá porque Presidente EDTL ne'e kala ema matenek mak ita tau iha-ne'ebá. Se ita tau ema ida iha-ne'ebá halo gestão ba ahi, quando ita la iha ema iha rai-laran mak iha capacidade, ita bele contrata ema mai husi rai-li'ur para bele resolve tiha problema ida-ne'e, tanba problema ahi ne'e ita gasta osan barak tebetebes ona ba iha-ne'ebá.

Foin daudauk Partido CNRT halo ninia declaração iha Ermera ne'e ita rona katak la kleur tan quase 100% ona, então 100% ne'e loos duni, maibé ho ida que bele halo ahi ne'e labele mate beibeik, mate beibeik ne'e estraga. Mate-moris mate-moris, ita ko'alia loloos ne'e ita estraga ita-nia buat barak, eletrônico iha ita-nia uma ne'e barak tebetebes, ema hakilar ona ida-ne'e. Ne'ebe, favor ida, Sr. Vice, haree assunto ida-ne'e ho seriedade.

Segundo, ha'u hakarak ko'alia nafatin ba tráfego ne'ebé ita iha resulta husi uma andar sira-ne'ebé halo loja e fa'an sasán iha dalan ne'e. Quase loron ba loron husi Tasi-Tolu sa'e to'o ba Becora ne'ebá ne'e la'ós dehan menos lae maibé aumenta ba beibeik. Sr. Ministro, favor ida, ami ko'alia ona ho Ministro das Obras Públicas, mas ita ható'o filafali bá iha Conselho de Ministros hodi haree problema ida-ne'e ho sério, tanba selae aban-bainrua ita la'o la di'ak. Quando sira-nia loja sira-ne'e mak loke hotu, loja boot sira-ne'e, paragem, *parkir*, la iha, ne'e loron ida, ha'u hanoin, ema atu mai serbisu mós hotu-hotu sei *terlambat* tanba ida-ne'e de'it.

Ida fali, ha'u hakarak fó obrigado barak ba declaração ne'ebé ha'u rasik mós haree husi televisão no mensagem husi telefone, obrigado ba Governo tanba momento ne'e ha'u mak halo levantamento, ha'u mak fó primeira declaração iha-ne'e atu husu estrada ba Letefoho, Atsabe no ba Ermera Lama. Ida-ne'e ha'u ko'alia dala rua ona. Ha'u fó obrigado, ha'u espera katak bele halo lailais tan hanesan declaração Ministro das Obras Públicas ható'o ne'e di'ak liu, maibé fó serbisu netik ba ita-nia maluk ermera-oan sira do que lori hotu husi li'ur mak bá, Ermera oan la hetan serbisu.

Ida-ne'e de'it mak ha'u hakarak ható'o.

Obrigado barak.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

A seguir, distinto Deputado Anacleto Freitas.

Faz favor.

Sr. **Anacleto Freitas** (CNRT): — Obrigado barak.

Ha'u-nia respeito ba Presidente Parlamento Nacional em exercício, composição da Mesa, colega Deputada no Deputado sira hotu, Vice-Ministro dos Assuntos Parlamentares, mídia, assessor no técnico sira e povo Timor laran tomak, bom dia ba ita hotu.

Ha'u hakarak foti assunto balu relaciona ho *listrik* iha Município Viqueque. Iha posto Lacluta *listrik* la lakan fulan tolu tiha ona, labarik sira estuda mós la di'ak, precisa ahi, buat sira-ne'e hotu, ne'ebe, karik bele, ható'o ba EDTL (Eletricidade de Timor-Leste) para bá haree motivo saida mak ahi mate to'o fulan tolu e la lakan fali. Karik bele, Sr. Vice-Ministro dos Assuntos Parlamentares, encaminha hela ba ministério relevante para bele haree.

Segundo, ha'u hakarak atu foti tan dala ida kona-ba bee iha Viqueque Vila, área Olobai, Akadiru Lulik, Boulai no Naeboruk. Cano iha hela mas bee ne'e la bá kleur tiha ona, ne'ebe, precisa haree mós ida-ne'e, selae ita-nia população balu hetan bee maibé balu la hetan, ne'e hanesan buat ida karik ita halo discriminação boot ida ba população. Ne'ebe ida-ne'e mak ha'u bele ható'o.

Ha'u hakarak mós atu ko'alia kona-ba estrada husi Uatúlári ba Quelicai, Laisorulai nian ne'e. Ita bá halo buat hotu-hotu tiha ona, mas to'o a data ninia realização ne'e la iha, ne'ebe, ha'u hanoin, ita

labele saida... Governo, halo ona lançamento ne'e, pelo menos tem que realiza bá, selae, ita halo tiha buat sira-ne'e hotu mak parado hela hanesan ne'e, ha'u la hatene ne'e atu halo nu'usá. Ita halo cerimónia boot, ministro tun hotu, autoridade local tun hotu, ita halo tiha festa boot ida mas ninia continuação ne'e la iha, parado.

Hanesan mós ami-nia ponte ida iha Welolo ne'e, ministro bá sobu tiha, to'o a data nia continuação la iha. Ha'u la hatene, iha ministério sira-ne'e halo falhanço hotu tiha, ita duun hotu ba Maun Xanana la halo, hanesan foin daudaun ita-nia maun-alin sira halo intervenção iha-ne'e dehan, Xanana mak la halo hotu de'it, *padahal* buat ne'e hotu-hotu iha ministério ida-idak nia serbisu. Ne'ebe ha'u hato'o hela ba Vice-Ministro dos Assuntos Parlamentares atubele hato'o ba ministério relevante para depois bele haree ida-ne'e.

Ikus liu, ha'u hakarak atu fó-hanoin hela. Colega balu ohin dehan, «FRETILIN ida uluk to'o agora mós FRETILIN», ha'u hanoin, ne'e la loos. FRETILIN ida uluk la hanesan FRETILIN ida agora, ita tem que tau buat ne'e loloos. FRETILIN ida uluk ne'e voluntário ba mate, voluntário ba ema nia tortura, voluntário ba castigo, to'o mai iha tinan 1999 nia missão hotu ona, FRETILIN ida agora ne'e hakohak cadeira Parlamento ne'e, sira naran sobu tun sobu sa'e, naran hatún ema tun-sa'e de'it, ne'e mak FRETILIN ida agora. FRETILIN ida uluk ne'e maioria, tanba saida mak tun mai hanesan ne'e ho cadeira hira de'it ona? Tanba ita nunca hadomi ema, ita la respeita liderança sira, ita la hadomi ita-nia maun-alin timoroan sira. Ninia impacto mak sai hanesan ne'e, ne'ebe, FRETILIN labele gaba an demais. Mas, FRETILIN ne'e hatutan funu. Partido ne'ebé hahú funu mós iha, partido ne'ebé hatutan funu mós iha, partido ne'ebé hakotu funu mós iha, ita labele mak ko'alia iha klaran de'it. FRETILIN hatutan, nia la'ós fundador, nia la'ós hakotu funu.

Obrigado.

Protesto husi Bancada FRETILIN.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

A seguir, distinta Deputada Sância Paixão Bano.

Faz favor.

Sr.^a **Sância Florência Paixão Bano** (FRETILIN): — Obrigada ba tempo.

Excelência Presidente Parlamento em exercício, maluk Deputado sira, membro IX Governo, Buibere no Maubere hotu, bom dia.

Excelência, hakarak secunda de'it declaração Bancada FRETILIN nian katak povo Maubere continua iha esperança no povo Timor-Leste precisa hetan atendimento ho di'ak no digno, no precisa tebes atu hetan atendimento máximo, liuliu iha parte saúde nian.

Sr.^a Presidente em exercício no Vice-Ministro, ha'u iha assunto rua mak hakarak hato'o iha-ne'e, liuliu ba pedido clarificação ida ba serviço saúde regional iha Oe-Cusse RAEOA (Região Administrativa Especial de Oe-Cusse Ambeno). Iha serviço saúde regional Oe-Cusse nian iha pessoal saúde na'in-tolu mak hetan transferência ba fatin seluk, maibé la tuir nia processo, dalan, no processo sira-ne'e responde diretamente ona husi Presidente da Autoridade RAEOA, Sr. Rogério Tiago Lobato, hasai carta anula transferência ba pessoal na'in-rua. Maibé, Sr. Secretário Regional Assunto Saúde, Luís Sudarso Neno, durante ninia serbisu ne'e la considera carta resposta ne'ebé Presidente Autoridade fó ba cancelamento transferência ne'ebé iha ona. Ida-ne'e afeta tebes ba processo salário ba pessoal saúde na'in-rua, ne'ebé la hetan salário husi fulan-junho 2024 tinan kotuk até à data, janeiro ne'e, la bele simu. Ida-ne'e fó impacto tebes, ba oan ne'ebé moras la bele halo tratamento saúde iha li'ur, la bele tanba osan. Ida-ne'e pessoal saúde na'in-rua ne'ebé serviço tinan barak, liuliu iha parte saúde. Carta ida-ne'e iha ona no simu diretamente ona mós husi Função Pública, ne'ebe husi parte na'in-rua ou tolu ida-ne'e mós hato'o carta ba Comissão F, PDHJ no Função Pública ne'ebé hatene kona-ba processo hirak ne'e. Parte jurídica autoridade RAEOA nian hatene claro no kle'an tebes kona-ba processo responde ba cancelamento carta transferência ida-ne'e. Pessoal seluk entre pessoal na'in-rua ne'ebé ohin ha'u temi iha-ne'e mós iha carta suspensão husi CFP 120 dias, maibé informação ne'ebé fó-sai husi Sr. Secretário Regional Assunto Saúde ne'e informação falsa tebes hasoru pessoal saúde ne'e, tanba ne'e afeta mós ba salário fulan rua, entre abril ho junho tinan kotuk até seidauk iha processo to'o agora. Comissão da Função Pública considera mós falta ne'e, maibé la simu, la considera autodefesa husi parte saúde ne'e rasik. Até à data seidauk hetan processo ne'ebé justo husi parte CFP, inclui Presidente da Autoridade RAEOA, mesmo iha resposta direta ona.

Agora, questão ida mak: sé mak atu rona sé? Sé mak loloos atu iha responsabilidade ba acto ida-ne'e, Sr. Presidente Autoridade ka sé? No hahalok Sr. Secretário Regional Assunto Saúde nian afeta tebes ba pessoal na'in-tolu ne'ebé iha processo nia laran.

Ikusliu, Sr.^a Presidente em exercício no Sr. Vice-Ministro, iha semana kotuk liubá, decisão Conselho de Ministros nian fó-sai katak exonera Sr.^a Elvira Manat, Secretária Regional Assuntos Finanças nian, iha-ne'e ha'u hakarak husu mós, labele exonera de'it, labele tuur-tuur hasai de'it, mas ha'u hakarak husu atubele mós halo auditoria, tanba antes ne'e abandona serbisu durante fulan tolu nia laran no continua usa património Estado. Ha'u la hatene agora sira foti ona ação ka seidauk, ida-ne'e precisa *check*, tanba ida-ne'e afeta tebes. No, pior liután, ba pagamento sira-ne'ebé seidauk halo, hanesan evento sira-ne'ebé acontece tinan kotuk até à data seidauk iha no mós pagamento sira seluk ne'ebé seidauk realiza. Husi ida-ne'e, ha'u precisa tebes clarificação, ne'ebe ha'u husu iha-ne'e.

Obrigada barak, Sr.^a Presidente.

Sr.^a **Presidente** (Maria Terezinha da Silva Viegas): — Muito obrigada, distinta Deputada.
A seguir, distinta Deputada Maria Angelina Sarmento.
Faz favor.

Sr.^a **Maria Angelina Lopes Sarmento** (PLP): — Obrigada, Sr.^a Presidente em exercício, muito bom dia.

Bom dia ba composição da Mesa, distintas Deputadas no distintos Deputados, no mós Sr. Vice-Ministro dos Assuntos Parlamentares.

Ha'u hakarak levanta assunto rua iha-ne'e.

Primeiro, husu ba Governo atu haree possibilidade atu loke dalan ba aceita tan *airlines* seluk atu mai Timor-Leste atubele iha competitividade ho *airlines* sira-ne'ebé existe.

Por exemplo, hanesan bá Indonésia, se la sala, ita assina *Air Services Agreements*, ita iha *slot* 24. Maibé, husi 24 por semana ne'e ita só foin bele preenche de'it 14 *slot per week*, então ita sei menos atu preenche tan 14 *slot* ne'ebé fó mai ita baseia ba ASA ne'ebé ita halo, ema bele exige ida-ne'e.

Então, se ita haree filafali ba oportunidade atu tama ka adere ba *ASEAN* (*The Association of South East Asian Nations*), se ita bele iha tan competitividade ba *Airlines* sira, liuliu ba Indonésia, sei di'ak liután, tanba ita haree fenómeno ne'ebé acontece, bainhira timoroan sira-ne'ebé iha classe médio hakarak ba visita rai-li'ur, liuliu bá Indonésia, sira prefere la'o viagem liuhusi terrestre, liuhusi Kupang. Kupang de'it sira nia viagem avião, *flight*, ne'e por dia 9 até 11 *flight*, ita-nian rua de'it, *Citilink* ho *Aero Dili*. Maibé, se ita bele, loke tan!

Se la sala iha tinan hirak liubá iha ona discussão ida katak iha mós *airlines* balu ne'ebé hakarak atu investe, hanesan *Air Asia*, tanba classe média ne'e só bele ho preço ne'ebé razoável, liuhusi viagem terrestre Indonésia. Quando liuhusi Kupang, ema haree *peluang*, oportunidade, negócio ne'e boot liu, liuhusi ne'ebá viagem ne'ebé ho custo ki'ik, barato, liuliu ba estudante sira, sira prefere liuhusi ne'ebá. Mas, se ita loke tan oportunidade ba *airlines* seluk, nia efeito multiplicador seluk mós iha. Ba ida-ne'e, ha'u hanoin, Governo bele haree to'ok, tanba ida-ne'e la'ós de'it ita foin ko'alia atu fó oportunidade, mas iha *Air Services Agreements* (ASA) iha duni ita-nia *slot*, ne'ebé to'o agora ita seidauk preenche. Se ita haree adesão ba *ASEAN*, se ita bele halo cumprimento mós ba acordo sira-ne'e no mós ita bele loke tan oportunidade seluk, ha'u hanoin, ne'e vantagem di'ak mós mai Timor-Leste.

Segundo, ha'u hakarak foti iha-ne'e kona-ba oinsá mak Governo bele organiza mercado. Ita haree iha Mercado Taibesi, ha'u rasik foti dala hira iha-ne'e, ita bele dehan, desorganizado. Mercado Taibesi la iha condições digno ba vendedor sira atu fa'an sasán iha-ne'ebá e fatin sira-ne'e, ita bele dehan, la iha higiene, la iha casa de banho, la iha estacionamento. Estacionamento motorizada ho carreta nian ocupa hotu husi vendedor sira, vendedor sira-ne'ebé fa'an hahán matak, fa'an hahán tasak, fa'an roupa iha hotu estacionamento carreta nian. Agora, ita hasai ema husi fatin público sira-ne'ebé sai alternativo ba negócio iha cidade Díli, depois ita dudu ba mercado, maibé condição mercado nian ita la prepara, condição mercado nian ita husik hanesan, bele dehan, fahi-luhan mós sei di'ak. Ne'ebe, ha'u hanoin, se ita hasai ema husi fatin público sira, Mercado Manleuana sei pelo menos, mas Mercado Taibesi la iha condições, ema la iha vontade atu bá fa'an iha-ne'ebá no ikusmai ema nia preferência ema hili estrada-ninin sira, fatin público sira, hodi bá fa'an sasán. Agora, sira bá fa'an ona iha-ne'ebá, ita sei bá duni nafatin sira, ita sei bá hasai nafatin sira. Bele iha condições ba sira fa'an ho certo tempo, ne'ebé ho controlo rigoroso, depois to'o horas hanesan ne'e tem que haruka sira taka, sira la taka mak ita foin aplica regras.

Então, ho nune'e ami hakarak husu atu Governo bele haree didi'ak condições iha Mercado Taibesi nian, ne'ebé tinan barak nia laran ami foti, mas la iha solução to'o agora, seidauk bele organiza adequadamente atubele motiva vendedor sira hodi fa'an iha mercado sira-ne'ebé Estado ka Governo providencia ona.

Ikusliu, ha'u hakarak secunda declaração Bancada FRETILIN nian sobre questão saúde iha Timor-Leste, liuliu tratamento iha Hospital Guido Valadares ne'ebé hetan retrocesso boot.

Ita la'ós ko'alia kona-ba saúde la'o di'ak hela, ita ko'alia kona-ba resultado saúde iha-ne'ebé. Ita injeta liuhosi orçamento geral do Estado, maibé resultado la iha. Saúde la'o di'ak? Ita hotu questiona, resultado la iha tanba ema mate liu ona padrão Organização Mundial Saúde nian. Ne'e ita tem que questiona. La'ós problema la'o di'ak hela, problema ne'e ita injeta osan ne'e resultado iha ka lae. Se resultado la iha, significa la'o la di'ak.

Obrigada.

Sr.^a **Presidente** (Maria Terezinha da Silva Viegas): — Muito obrigada, Sr.^a Deputada.

Tuirmai, distinta Deputada Maria Gorumali Barreto.

Faz favor.

Sr.^a **Maria Gorumali Barreto** (CNRT): — Obrigada.

Ha'u-nia bom dia ba Sr.^a Presidente do Parlamento Nacional interina, Sr.^a Secretária da Mesa, caro distinto Deputado sira hotu, Sr. Vice-Ministro dos Assuntos Parlamentares, audiência tomak no mós rona-na'in Rádio Parlamento Nacional.

Primeiro, ha'u atu foti questão ida, ha'u simu informação mai husi Diretor Ensino Básico Central Haubá, questiona kona-ba assunto ida-ne'ebé foti iha Plenária liga ho cobrança ilegal ne'ebé acontece. Tuir loloos, informação ida-ne'ebé loos mak clarificação ne'ebé mai husi Diretor Ensino Básico Central Haubá, hato'o katak cobrança ilegal ne'e mai kedas husi início 2023, ne'e katak mai husi VIII Governo, Governo anterior, ne'ebe la'ós acontece iha diretor ida agora. Cobrança ne'ebé iha, ne'ebé horibainhira foti iha-ne'e, ne'e reunião husi conselho dos pais ne'ebé realiza iha dia 16 de dezembro 2024 e momento ne'ebá despedida finalista 9.º ano nian, tanba ne'e mak iha concordância hodi realiza ida-ne'e. Ida-ne'e mak ha'u hakarak atu clarifica ba público atubele hatene loloos.

Tuirfalimai, kona-ba declaração política Bancada FRETILIN nian, ha'u hakarak atu dehan de'it katak serviço saúde la'o normal hela. Ita sira-ne'ebé iha Sala laran ne'e balu bá consulta hela, balu bá halo *check up* hela, ne'e significa katak saúde la'o normal hela. Declaração política ida-ne'ebé mai husi Bancada FRETILIN nian ne'e ha'u considera hanesan declaração política ida-ne'ebé iha ódio ho vingança, declaração política ida-ne'ebé resultado fiscalização husi mídia social e declaração política ida-ne'ebé insulta de'it Sua Excelência Sr. Primeiro-Ministro, declaração política ida-ne'ebé ha'u bele dehan katak *post power syndrome*, ida-ne'e mak liafuan ida-ne'ebé *pas* ba Ita-Boot sira. Tanbasá mak ha'u dehan insulta de'it Sua Excelência Sr. Primeiro-Ministro? Tanba liafuan ida-ne'ebé usa hodi dehan «protege estimada», romantismo. Ha'u hakarak dehan katak ne'e linguagem ética la iha, linguagem ida-ne'ebé mai husi ema ne'ebé *latar belakang*, *background* educação la iha, tanba usa linguagem ida-ne'ebé halo difamação hasoru Sua Excelência Sr. Primeiro-Ministro. Ida-ne'e claro. Ha'u hakarak atu dehan katak ida-ne'ebé foti hela ne'e, nia halo fiscalização mós la bá direta, ne'ebe, Sr.^a Presidente interina, ha'u sugere, di'ak liu ita-nia Regimento Parlamento Nacional ne'e halo revisão tiha para fiscalização labele bá direta, maibé fiscalização liuhosi mídia social de'it.

Ba povo doben Timor-Leste ha'u hakarak atu dehan katak declaração ida *post power syndrome* ne'e hatudu dehan katak *seolah-olah* saúde ne'e sira mak iha poder liu atubele hadi'a, ema seluk la bele iha poder atu hadi'a. Mas, ha'u hakarak atu dehan katak iha realidade saúde la'o hela e tratamento ba rai-li'ur mós la'o hela.

Obrigada barak.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

A seguir, distinto Deputado Antoninho Doutel Sarmento.

Faz favor.

Sr. **Antoninho Doutel Sarmento** (FRETILIN): — Obrigado ba tempo.

Ha'u-nia respeito ba Sr.^a Presidente Parlamento interina, presidência da Mesa, Sr. Vice-Ministro dos Assuntos Parlamentares, colega Deputado e Deputada sira hotu, mídia, técnico, assessor sira, povo Maubere no Buibere, saudações revolucionárias!...

Sr. Deputado sira husi FRETILIN: — Sempre revolucionárias!

Sr. Antoninho Doutel Sarmento (FRETILIN): — ... Em primeiro lugar, lori FRETILIN nia naran ha'u harak parabeniza futebolista U15 ne'ebé joga iha Nação laran no U15 husi Manufahi sai hanesan campeão iha jogo ne'e, parabéns ba sira. No, ba sira-ne'ebé la consegue, continua atu resiste nafatin ba competição sira tuirmai!

Segundo, ha'u hakarak parabeniza timoroan na'in-rua, patriota na'in-rua, lori Timor-Leste iha mundo *boxing* nian, Irmão Daniel, ne'ebé hatún Sakti ho *ronde* tolu, no Irmão Délio, ne'ebé hatún Alisher iha segunda *ronde* de'it.

Ita hotu hatene katak Uzbequistão país ida iha médio oriente, ne'ebé halo investimento boot liu iha desporto mais moderno, no ita hatene mós katak ninia boxista sira quase sai campeão mundial. Timor-Leste foin tama iha século XXI harii an hanesan nação, maibé horikalan ita haree jogo ida-ne'ebé Délio ho Ali nian ne'e hatudu Timor-Leste nia qualidade técnico-profissional iha *boxing*. Ne'e buat ida que merece ita hotu hakru'uk ba sira, tanba ne'e ita mós parabeniza no agradece ba timoroan sira iha rai-laran no iha rai-li'ur, empresa sira-ne'ebé contribui ba sira hodi bá hala'o jogo ida-ne'e.

Husi ida-ne'e ita husu ba Governo atu tau atenção, liuliu atu halo desenvolvimento iha nível desporto atu tau equipamentos mais modernos, hodi promove ita-nia jovem sira-nia talento iha jogo *boxing* sira, ne'e ita exige para Governo, pelo menos, tem que halo investimento ida-ne'ebé di'ak iha futuro.

Tuirmai, ha'u hakarak reforça declaração Bancada FRETILIN nian liga ho assunto saúde.

Sr. Vice-Ministro, se sai líder karik labele líder de'it, tem que sai gestor mós. Líder ne'e hamriik iha oin mas gestor ne'e tem que hamriik iha klaran. Atu halo saida? Atu haree problema sira-ne'ebé ita hotu sente.

Por exemplo, ita bá base ita rona ema dehan la iha mina atu enche para tula paciente sira bá hospital. Ema sira iha kraik hatete, ha'u la bosok, Senhora, ha'u la bosok! Ha'u iha Fatuberliu sira hatete, la iha mina atu enche ba carreta. Iha Soibada também hanesan.

Ita hatene hospital sira iha rai-li'ur começa trava, lakohi simu ita-nia paciente sira, problema ita hakarak haree oinsá atu fó solução ba situação sira-ne'e. Declaração ne'e la'ós hanesan ohin sira balu hatete, katak *syndrom* ka saida. Ha'u acha, ida-ne'e hanesan cómico fali. Ita husu componente ida-ne'ebé responsável ba assunto ida-ne'e tem que assume responsabilidade para controla situação sira-ne'e, para ita-nia paciente sira sente seguro bainhira bá hospital.

Ita foti exemplo de'it, ita bá *apotik* ida ai-moruk sira la falha e sira iha loron-loron. Agora, ita iha ministério ida, ho ai-moruk, ho ossan, ho poder, mas depois paciente sira balu bá iha-ne'ebá que la iha ai-moruk?

Atu bá hospital sira iha Same Vila precisa enche mina, mina la iha fali, ne'e husu para gestor ne'e atu haree didi'ak problema sira-ne'e.

Iha Ministra e depois iha Vice-Ministro na'in-rua, nu'usá mak la fahe sasán hirak ne'e ba malu? E até combatente sira mós hatete: «Ministra ida-ne'e halo nu'usá mak ne'e, nu'usá mak buat hotu sai problema nune'e?»

Ida-ne'e mak ha'u atu fó-hanoin para tem que haree situação sira-ne'e atu resolve, tanba, liuliu ita-nia ema ki'ik sira iha base. Ita ne'e di'ak hela, orsida halai bá-mai ne'e lailais de'it, agora ida iha kraik ne'e, então ita buka atu hatene responsabilidade ba assunto hirak ne'e.

La'ós iha mídia social mak lori mai halo declaração ne'e, lae! Ne'e foti iha base, realidade, ne'e mak ita mai ko'alia iha-ne'e. Tanba ita representa povo, ita la representa líder iha-ne'e, então tem que ko'alia povo nia problema

Tuirfalimai, atu condena mós atuação vandalismo ida iha Viqueque ne'e, polícia tem que hakru'uk ba lei no ordem, atua ema, fó continência ema depois mak ita bele lori ema bá resolve iha quartel ne'ebá, la'ós ita bá hu'an ema iha estrada laran, iha fatin público, hodi hatudu ita nia *power*, ne'e sala!

Ita labele atua sasán hanesan reacionário sira-ne'ebé uluk hatún ativista resistência sira, ne'e sala! Kaer nia, fó continência tiha nia, lori nia bá resolve iha quartel, ne'e mak ema dehan ordem no lei. Tem que atua sasán tuir lei Nação ida-ne'e nia hakarak, labele atua fali tuir ita-nia gosto, ne'e mak sala!

Obrigado.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

A seguir, distinta Deputada Carminda Carlota.

Faz favor.

Sr.^a **Carminda Carlota** (CNRT): — Ha'u-nia bom dia ba Sr.^a Presidente em exercício, componente da Mesa, distintas e distintos Deputados, Excelência Sr. Vice-Ministro dos Assuntos Parlamentares no mós povo do ben hotu.

Sr. Vice-Ministro, iha fim-de-semana ha'u halo ha'u-nia contacto ho eleitorado iha Município Bobonaro, estrada ida antes atu sa'e ba *Pintu Gerbang* ne'e besik atu kotu ona, só roda loos de'it mak bele liu. Horisehik iha ambulância ida tula ema mate tun mai no consegue atu monu, população sira

parte iha-ne'ebá mak ajuda hodi bele liu. Então, ami husu ba Vice-Ministro atubele ko'alia ho ministério competente, mós ho Município Bobonaro nian, hodi resolve lailais assunto ida-ne'e tanba importante tebes, dalan husi Posto Administrativo Bobonaro mai Maliana.

Segundo, ha'u mós atu secunda tan de'it saida mak ohin distinta Deputada Lízia ko'alia tiha ona, kona-ba ita-nia feto maluk ne'ebé ho moras mental sa'e fali ba ai-riin eletricidade nian. Ha'u haree iha vídeo barak mak ema *share* e ema barak mak haree, iha-ne'ebá, inclui mós iha mane barak, maibé ha'u lamenta, tanbasá mak la iha ema ida bele ajuda bá kaer nia, hotu-hotu haklalak, haree, halo vídeo de'it to'o ita-nia feto maluk ne'e lakon nia vida.

Terceiro, ha'u mós atu secunda tan de'it intervenção husi Sr. Deputado Virgílio nian kona-ba estrada husi Ponte Nunura ba Maliana, loos duni, estrada ida-ne'e aat desde tinan kotuk.

Husi Comissão E bá halo fiscalização tiha ona, e, ami consegue ko'alia ona ho companhia *HK (Hutama Karya)*, maibé to'o agora la iha resultado, ita la'o bá-mai estrada ne'e hetok aat liután. Husu ba Sr. Vice-Ministro, se bele, ko'alia, bolu to'ok companhia ne'e para haree to'ok situação ida-ne'e.

Ha'u atu dehan de'it katak ohin loron ita bele ko'alia buat hotu dehan Governo ne'e aat hela de'it, ita bele tenta to'o ko'alia ita-nia Primeiro-Ministro ne'e la iha ida maka di'ak, sempre dehan aat hela de'it, ne'e tanbasá? Tanba ita la ukun ne'e la iha buat ida mak di'ak iha ita-nia oin, iha ita-nia oin ne'e mak ida aat hela de'it.

Ikusliu, ha'u atu dehan mós «Fiar-an la'o ba oin, hadi'a Nação husi base.»

Obrigada.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

A seguir, distinto Deputado Natalino dos Santos.

Faz favor.

Sr. **Natalino dos Santos Nascimento** (CNRT): — Bom dia ba Sr.^a Presidente, Mesa, Sr. Vice-Ministro dos Assuntos Parlamentares no colega Distinto Deputado sira.

Ha'u atu foti questão ida, liuliu kona-ba *zebra cross*.

Ha'u haree katak *zebra cross* sira-ne'e, primeiro, nia tinta ne'e iha lakon tiha ona; segundo, *zebra cross* ne'e tau la tuir nia fatin.

Ha'u foti exemplo de'it, curva ida iha Parlamento nia sorin ne'e, ita haree, problema tebetebes, quando ema liu *zebra cross* bele choque kedas, tanba ne'e ha'u husu ba Sr. Vice-Ministro atu haree assunto ida-ne'e.

Agora ha'u hakarak foti tan kona-ba construção andares ne'ebé, ha'u questiona beibeik, chinesa sira halo. Ha'u preocupa tebetebes. Ita haree halo usa *besi baja*, ninia sinta ne'e la iha, ida-

ne'e andar tolu, haat, perigo tebetebes. Tanba ne'e ha'u hakarak husu: será que iha supervisão husi Obras Públicas? Iha licença ka lae? Construção iha qualidade ka lae?

Ha'u ta'uk mak depois de contrato 20 ka 30 anos de duração, quando sira husik, uma ne'e mós aat ona. Ida-ne'e perigo boot tebetebes ba ita, tanba ne'e ha'u ba husu Governo atu haree assunto ida-ne'e.

Terceiro, ha'u hakarak secunda saida mak Deputado Firmínio foti, liuliu kona-ba ró *Success*. Se ita fó subsídio ba *Aero Dili*, ha'u husu atu fó mós subsídio ba ró *Success* porque transporta cidadão, população sira iha Díli bá Oe-Cusse, e, ita agradece tanba timoroan ida mak investe iha-ne'ebá. Ha'u husu para bele fó subsídio porque nia ajuda, quando ema mate nia tula, ema moras nia tula, tanba ne'e ha'u husu Governo atu tau atenção, e, bele motiva tan timoroan ne'ebé iha hanoin di'ak ba Rai ida-ne'e.

Quarto, ha'u hakarak fó informação, ohin colega balu julga, ha'u mós lamenta, atitude ne'ebé *oknum* PNTL sira halo. Maibé, informação, ha'u quando hetan, tenta coordena kedan ou buka informação, e loos duni, ita labele halo julgamento lai porque ita hetan parte ida. Polícia la'ós criminoso, às vezes atitude mak ita ladún saida.

Tuir informação, ita-nia cidadão ne'e bá lori isqueiro, tenta atu sunu carreta privada, carreta *dinas* sira-ne'ebé pára iha-ne'ebá, então, polícia sira halo atuação nia halai. Nia halai mak polícia sira kaer nia. Sr. ne'e, cidadão ne'e, naran Lourenço Gusmão, nia ema husi Suco Matahoi, Uatulári. Precisa halo investigação, tanba ne'e ha'u husu ba colega sira labele julga lai polícia, labele hasai lai liafuan ida dehan «polícia criminoso», «polícia vandalismo», ida-ne'e ha'u la aceita! *Oknum* nia atuação ne'e ita tem que bolu atenção ba sira para labele atua hanesan ne'e. Maibé, iha investigação mak haree. Tanba comando iha-ne'ebá la iha luto proteção, então ema bele saida... Tanba ne'e ita tem que haree assunto ida-ne'e ho sério, e, ha'u husu ona atubele halo investigação ba problema ne'e.

Ha'u mós preocupa tebetebes ho eletricidade, maibé ha'u haree katak iha andar boboot mosu ona, ida-ne'e mós bele prejudica energia ne'e.

Ha'u fó exemplo, hotel Hilton, hotel boboot sira, andar sira-ne'ebé china sira halo, andar lima, neen ba leten, ida-ne'e mós han energia, ho nune'e capacidade energia la suficiente. Ha'u husu ba Governo atu tau consideração, atu haree, tau tan estação balu.

E, ha'u hakarak hatete, colega sira, liuliu ohin balu hatete, «Governo ida-ne'e la di'ak», di'ak, loos, normalmente tem que iha crítica, maibé, ita tem que haree. Tanba ne'e ha'u husu ba Mesa, relatório Comissão hotu-hotu ne'e bele halo distribuição de'it, maibé relatório fiscalização Comissão Saúde nian tem que lori mai halo apreciação para depois aberta kona-ba dados, informações ne'ebé Comissão F ba halo fiscalização iha base. Colega sira-ne'ebé halo declaração ne'e quase membro Comissão F, ida-ne'e mak ha'u questiona. Então Ita-Boot sira ladún efetivo bá halo fiscalização tanba

dados ne'e contrário, dados husi Comissão F oin seluk, declaração oin seluk. Tanba ne'e ha'u husu dala ida tan ba Mesa atu relatório fiscalização Comissão F nian tem que mai halo apreciação iha Plenário para ita hotu-hotu bele fó-hanoin. Ida-ne'e de'it mak ha'u hakarak foti iha-ne'e.

Kona-ba negociação fronteira ne'e tem que ko'alia liafuan, termos negociação, tem que negocea: «ó-nia mak ne'e, ha'u-nia mak ne'e, dada bá ne'ebá hira dada mai ne'e hira para bele hetan solução». Agora, Ita-Boot sira fó tiha competência, depois, quando la ukun ona questiona fali competência ne'e, ne'e mak ha'u haree katak la loos. E, ha'u husu colega sira atu compreende didi'ak e lê filafali resolução iha-ne'ebé Ita-Boot sira atribui competência ba negociador fronteira marítima.

Ida-ne'e de'it mak ha'u hakarak foti iha-ne'e.

Obrigado.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, distinto Deputado Marcos Xavier.

Faz favor.

Sr. **Marcos Xavier** (CNRT): — Obrigado ba oportunidade.

Bom dia ba Sr.^a Presidente interina, composição da Mesa, colega distinto Deputado sira, mídia, Sua Excelência Sr. Vice-Ministro dos Assuntos Parlamentares.

Iha semana liubá iha colega barak mós foti kona-ba situação iha Díli laran, liuliu liga ba Ministério dos Transportes e Telecomunicações.

Primeiro, rede *internet* ne'e lento la halimar, problema iha-ne'ebé?

Segundo, transporte sira-ne'ebé circula iha Díli laran, liuliu microlete, táxi sira-ne'e, começa ona halo *reben*, então ladún assegura passageiro sira-ne'ebé atu utiliza carreta. Ne'e duni husu ba ministro relevante no mós PNTL atu haree microlete ho táxi hirak-ne'ebé utiliza *reben* ne'e.

Terceiro, iha semana liubá iha mós Deputado balu foti kona-ba Ponte Loes. Se ida-ne'e mak Ministro das Obras Públicas la toma atenção, fulan ida ka fulan rua acesso husi Atambua, Indonésia, mai Timor-Leste la bele tanba ponte atu kotu ona. Horisehik ha'u liu iha-ne'ebá, ponte começa kle'an tun ona. La kleur tan, se udan boot, fulan ida ka fulan rua ponte ne'e bele monu.

Tuirmai mak Ponte Nunura – ohin colega lubuk boot ida mós ko'alia kona-ba estrada, ha'u secunda tan de'it – Ponte Nunura mós hanesan ne'e, bee começa fai fali mai iha parte loromonu nian, la kleur tan, fulan ida ka fulan rua ponte refere mós bele monu, então acesso husi Díli ba Maliana mós la bele. Ho ida-ne'e, husu ba Ministro das Obras Públicas atubele tau atenção ba ponte rua ne'e, selae ita atu halo viagem ba Bobonaro la bele tanba ponte rua ne'e ameaçado.

Iha tinan kotuk liubá mós ha'u foti beibeik, ha'u dehan: «Hadi'a ona ponte ne'e!», maibé iha obra ida iha-ne'ebá halo hela iha Ponte Loes, no fim husik hela tiha, companhia ne'e la iha tiha, ponte ne'e agora ameaçado. Ho ida-ne'e mak husu ba Ministro das Obras Públicas toma atenção ba ida-ne'e.

Nune'e mós estrada ne'ebé iha Aimutin, uluk projeto ne'e emergência, maibé projeto ne'e agora normal fali ona. Tanba saida ha'u questiona ne'e? Ha'u-nia carreta de'it atu sai husi ha'u-nia uma mai estrada la di'ak tanba sira ke'e tiha bee-dalan ne'e. Depois, sira-nia serbisu mak ne'e, tama 11h00, meio-dia sira bá han la mai ona halo serbisu. Ha'u la hatene, companhia nia capacidade iha ka lae? Companhia naran *Dili United*, nia halo serbisu ne'e lento la halimar.

Ami, Comissão E, mós bá halo ona fiscalização iha-ne'ebá, nia promete dehan iha dezembro ne'e bele finaliza, dezembro la finaliza e agora tama fevereiro tan ona. Se companhia ne'e la bele, fó fali ba companhia seluk. Comunidade sira hela iha Aldeia São Miguel atu liu la di'ak tanba companhia refere halo tarde la halimar. Se la iha recurso, la iha equipamento atu halo, hapára tiha! Husu ba Ministro das Obras Públicas atu hapára tiha companhia refere.

Ha'u hanoin, ida-ne'e de'it mak ha'u-nia intervenção.

Obrigado.

Sr.^a **Presidente** (Maria Teresinha da Silva Viegas): — Muito obrigada, distinto Deputado.

Ikusliu, distinto Deputado Luís Roberto.

Faz favor.

Sr. **Luís Roberto da Silva** (KHUNTO): — Obrigado, Sr.^a Presidente do Parlamento Nacional.

Bom dia ba Ita-Boot, Sr.^a Secretária da Mesa, Sr. Vice-Ministro dos Assuntos Parlamentares, colega Deputado no Deputada sira no povo doben Timor-Leste.

Iha-ne'e ha'u atu foti assunto ida kona-ba clínica privada sira-ne'ebé loke iha Díli laran, ha'u refere liu ba clínica Flodova.

Iha dia 16 de dezembro, ami-nia maluk ida bá halo tratamento iha-ne'ebá, selu clínica refere ho folin ne'ebé karun demais, quatro dias ne'e selu quase oito mil e tal, maibé doutor sira iha-ne'ebá la consegue salva ami-nia maluk ida-ne'e.

E depois, la halo serbisu conjunto ho ita-nia Hospital Guido Valadares, sira lori direta bá Siloam Kupang. To'o iha-ne'ebá, resultado exame ne'ebé hasai iha clínica Flodova la hanesan ho iha Siloam Kupang nian. Tuir resultado ne'ebé Siloam Kupang hasai, doutor sira-ne'ebé sona ami-nia maluk iha Flodova ne'e ho *over dosis* tanba ne'e mak afeta ba nia saúde e resulta nia mate. E, família mós consegue halo problema uitoan iha Flodova. Tanba ne'e husu ba Ministério da Saúde, ba PCIC

(Polícia Científica e de Investigação Criminal), ba mós instituição relevante sira, oinsá bele halo investigação kle'an kona-ba ida-ne'e.

Quando clínica sira-ne'ebé loke iha Timor la iha qualidade, doutor sira mai *praktek* iha Timor mak barak, então oho ita-nia ema. Satán selu ho folin ne'ebé karun demais, quatro dias de'it oito mil e tal, depois resultado médico nian mós família nunca hatene, sira sempre taka ba família sira. Sira continua lori bá Siloam Kupang, to'o iha-ne'ebá resultado exame médico ne'e la hanesan, tanba ne'e mak husu ba Ministério da Saúde no Governo atu haree didi'ak ba *apotik* privado sira-ne'ebé loke iha Timor. Quando sira mai para *bisnis* de'it, ne'e oho ita-nia ema.

Segundo maka kona-ba lixo. Lixo ida iha Raikotu rate nian tun ba tasi-ibun, iha-ne'ebá quase butuk hamutuk aas demais, lalar mós hobur, udan tan, ita-nia comunidade sira mós soe tan bebé nia *popok* sabraut iha-ne'ebá, na'an kulit mós soe iha-ne'ebá hotu. Ida-ne'e afeta liu ba saúde, então halo nu'usá mak ita-nia Autoridade Município Díli controla didi'ak lixo sira-ne'e, suru lixo ne'e rotina. Tanba iha Raikotu ne'ebá parece quase semana ida ou semana rua la suru fo'er ne'e, então comunidade sira soe no butuk ba nafatin, depois udan tan. Ida-ne'e mak ita precisa haree didi'ak atubele, suru lixo karik, rotina. Domingo bele descansa, maibé segunda to'o sábado bele suru para saudável ba ita-nia comunidade sira-ne'ebé hela iha Raikotu ne'ebá.

Ida-ne'e mak ha'u hakarak hato'o.

Obrigado wa'in.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Ita conclui ona inscrição sira. Iha ponto de ordem mais de 10 Deputados, ha'u sei la fó ona, ha'u husu desculpa.

Ikusliu, ha'u fó tempo ba intervenção husi Bancada FRETILIN ba declaração política.

Faz favor.

Sr. **Antoninho Bianco** (FRETILIN): — Obrigado.

Ha'u-nia respeito dala ida tan ba componente Mesa, representante do Governo no maluk sira hotu.

Primeiro de tudo, ha'u hanesan representante Bancada e representante povo, sira-nia tilun, sira-nia matan, sira-nia sentimento no sira-nia lian mak ita lori, ne'ebe cinco sentidos iha corpo humano ne'e iha ita, ita mak representa povo, tanba ne'e mak hanesan tilun, matan, ibun no sentimento husi povo, ami halo declaração ne'e hatutan sira-nia lian, sira-nia sofrimento, sentimento atu fó-hanoin ba ukun-na'in sira-ne'ebé representa povo iha Parlamento no ukun-na'in sira-ne'ebé iha Executivo iha fatin ne'ebé sira haknaar an.

Claro, iha bíblia mós hatete, sé mak iha tilun bele rona bá, sé mak iha matan bele haree bá, sé mak iha sentimento bele sente bá, maibé la'ós hotu-hotu iha sentimento, la'ós hotu-hotu iha matan atu haree, la'ós hotu-hotu iha tilun atu rona. Maibé, ba FRETILIN, ba Rai ida-ne'e, iha processo hahú ho missão ida libertação Pátria e libertação povo, sira husik ona mundo ne'e, sira husik hela ba ita. Ne'ebe, ha'u hanoin, ita tem que sente, ita tem que ko'alia atu lori libertação povo ba oin ne'e hanesan ne'ebé, ne'e missão ida que FRETILIN sei nafatin continua ho nia obra. Ha'u hein katak partido hotu-hotu mós dehan comunga princípio ida-ne'e, além de libertação da Pátria e libertação povo, ne'e princípio uluk to'o agora e ba oin nafatin, tanba ne'e mak FRETILIN uluk, agora e ba oin nafatin.

Ami hein katak loroloron ou tinan-tinan ita haknaar an ne'e ita labele dehan knaar ne'e ita-nian, knaar ne'e Maromak nian. Se obra Maromak nian mak ita hala'o, ita labele foti an ba malu. Então, ita buka atubele hala'o knaar para serbí, la'ós ita buka gaba malu de'it, maibé ema balu sofre hela.

Ita-Boot sira acompanha mídia, agora ko'alia dehan ai-moruk iha ne'e iha-ne'ebé? Ita-Boot sira haree to'ok, ema tun mai aeroporto ema dehan ami nune'e. Ne'e ita lalika ko'alia barak fali. Ne'ebe, ha'u hanoin, Ita-Boot sira la rona, ami mós la halo sala imi tanba *memang* iha mundo ne'e nune'e duni, ema balu la gosta lia-loos e hatoman an ona iha nakukun, matan nunca hakarak haree naroman, iha tilun ne'ebé baibain rona mas bele lakohi rona. La buat ida, maibé ami usa moris ne'e tem que hatete lia-loos. Lia-loos la'ós ami mak inventa, maibé lia-loos sira-ne'ebé iha foho ema halerik ba ai-moruk ho tratamento, la'ós iha-ne'e. Iha-ne'e ne'e normalmente ita mobiliza comissão ne'e bá organizado, buat hotu-hotu la'o di'ak, maibé ne'e ita la bele subar.

Tanba ne'e, maluk sira, ami-nia hanoin mak ne'e: povo sira, Ita-Boot sira acompanha, sira dehan buat hotu-hotu la'o di'ak, la buat ida, ne'e sira-nia oposição ka, sira mak kaer ukun ka, sira dehan buat hotu-hotu di'ak ne'e, ha'u la hatene. Maromak hatene buat hotu-hotu ne'ebé ita subar hela, Rai ne'e hatene ita la'o iha leten, loron ne'e hateke nune'e. Ohin ne'e ema dehan *Kitab Kejadian*, buat hotu ne'ebé acontece iha mundo ne'e Maromak dehan di'ak nia di'ak, aat ne'e aat. Ne'ebe, ha'u-nia hanoin mak ne'e, di'ak liu imi usa buat ne'ebé ami fó aspiração, halo melhoramento ba tratamento ema nia moris.

FRETILIN uluk, agora, ba oin nafatin e maluk sira-ne'ebé iha partido seluk ne'e di'ak liu Ita-Boot sira trata imi-nia partido seluk tanba ami iha estatuto próprio, manual político ketak, estatuto ketak, ne'ebe, ida-idak la'o tuir nia dalan. Ita lalika dehan FRETILIN uluk ho agora la hanesan, ami mak ne'e, uluk to'o agora nafatin...

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Sr. **Antoninho Bianco** (FRETILIN): — ...Ida-ne'ebé agora tuur iha leten ne'e mós uluk iha FRETILIN, hirak ne'e mós uluk iha FRETILIN, ne'ebe ohin loron bá fatin seluk ne'e ami la questiona, maibé FRETILIN sei iha katak imi loos duni ka lae.

Obrigado.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Ikusliu, ha'u fó tempo ba Sr. Vice-Ministro, karik atu responde resumidamente dentro de 10 minutos.

Faz favor, Sr. Vice-Ministro.

Sr. **Vice-Ministro dos Assuntos Parlamentares** (Adérito Hugo da Costa): — Muito obrigado.

Sr.^a Presidente Parlamento em exercício, membro da Mesa, distinto e distinta Deputado sira hotu, bom dia.

Sr.^a Presidente Parlamento Nacional em exercício, ha'u fó de'it opinião geral, em nome do Governo, ba ponto rua, declaração política ho intervenção sira.

Kona-ba declaração política, Governo regista ponto situação hotu-hotu sobre atendimento saúde iha centro saúde iha território nacional tomak.

Hakarak adianta de'it katak ligação ho pagamento ba dívidas 18 milhões de dólares iha 2024 tinan kotuk, ne'ebé acumula dívidas tinan barak iha kotuk, adianta ona pagamento balu iha tinan kotuk, 2024, e, 2025 nian, hanesan Deputado sira hatene, ita aloca tan 18 milhões de dólares iha orçamento 2025, ne'ebé ninia intenção atu halo pagamento. Portanto, Ministério da Saúde, ho supervisão husi Sua Excelência Sr. Vice-Primeiro-Ministro Mariano Assanami, halo ona contacto desde tinan kotuk, e tinan ida-ne'e intensivo, ho hospital sira-ne'e para fó nafatin confiança atubele simu nafatin ita-nia paciente sira-ne'ebé transfere husi Timor-Leste. Nafatin coopera, coordena ho hospital sira-ne'e atu verifica fatura sira-ne'ebé composto iha dívidas 18 milhões de dólares ne'ebé mai iha tinan lubuk ida nia laran. Portanto, gestão nafatin halo ba atendimento, cooperação ho hospital sira continua.

Hanesan ha'u adianta ona iha semana kotuk, katak iha mós possibilidade loke contacto ho hospital sira iha Austrália, liuliu Darwin, tanba distância besik, la to'o horas ida semo. *Kalau* ita halo transferência paciente sira bá Darwin nia facilidade sira, la to'o horas ida, do que ita bá fatin seluk hanesan Bali, Jakarta, Singapura ho Malásia.

Portanto, iha parte infraestrutura nian continua halo no eleva facilidade infraestrutura iha Hospital Nacional Guido Valadares, projeto balu *on going* hela, no plano seluseluk mai nafatin kona-

ba aumenta facilidade sira para bele hetan fatin ida adequado hodi tau ita-nia equipamento tratamento saúde, mós médico sira-ne'ebé mai.

Ita mós continua halo cooperação ho médico internacional sira-ne'ebé iha possibilidade atu halo investimento iha ita-nia hospital sira, mai husi investimento privado internacional sira. Governo continua halo serbisu para hadi'a setor ida-ne'e.

Kona-ba declaração política Bancada FRETILIN nian, regista ona iha-ne'e, Sr. Deputado sira hotu, decisão hotu-hotu liga ho *Greater Sunrise*, mandato claro ba negociação principal.

Constituição hatete katak negociação ka acordo tratado internacional ne'e competência exclusiva Executivo nian, portanto, la'ós Parlamento, nem Presidente da República, nem partido político nian, ne'ebe, legalidade constitucional mak ida-ne'e. Mas, la to'o de'it iha-ne'e, Sr. Deputado sira hotu, atu halo serbisu ida-ne'e, deliberação ida iha Parlamento, Resolução Parlamento iha 2014 ba criação comissão ba delimitação fronteira permanente Timor-Leste ho Austrália. Bancada FRETILIN, ne'ebé consistentemente cada tinan eleição iha nia representante, ha'u sente, iha memória sobre deliberação sira-ne'e. Portanto, la bá por bá de'it ou usa naran Kay Rala Xanana Gusmão de'it, mas ne'e usa naran Estado nian. Deliberação claro, iha Parlamento iha 2014, deliberação Conselho de Ministros VII Governo, ohin Sr. Deputado Kalohan dehan. Se Bancada FRETILIN ohin tau em questão legalidade ida-ne'e, ita kala regista de'it ona iha história ida-idak ninia contribuição perante sucesso, história boot ida manán fronteira Timor-Leste ho Austrália ne'e, segundo sucesso. Bancada FRETILIN contra ato Estado nian ida-ne'e, regista iha Parlamento ne'e e regista iha história Timor-Leste nian, sira-ne'ebé vota contra ho sira-ne'ebé vota a favor.

Sr. Deputado sira hotu, negociação fronteira marítima, ohin kona-ba cenário 30% e 20% iha tratado iha anexo, ohin Sr. Deputado sira temi ho di'ak tebetebes, hakarak hatete de'it, regime anterior antes delimitação fronteira, campo ida *Greater Sunrise* ne'e Timor-Leste iha de'it vinte e tal por cento iha regime ida Zona de Desenvolvimento Conjunto, ida ita la hatene nia futuro to'o 30 até 50 anos ne'e. Depois de negociação fronteira manán, delimitação fronteira marítima ne'e permanente, ita la iha ona Zona Desenvolvimento Conjunto, maibé iha campo ne'e iha de'it mak 21% que faz parte jurisdição Austrália nian, tan ne'e mak 20% ne'e ema nian, ema nian kedas tuir *median line* tuir tribunal decide ne'e, ne'ebe, ita atu dehan ita-nia 100% labele! *Median line* ne'e mak monu tiha ba campo Austrália nian 21%, ida antes ne'e ita iha de'it 20%, ne'e mós la'ós jurisdição nacional, ne'e zona desenvolvimento conjunto.

Facto histórico tem que regista. Instituição democrática sira iha rai-laran ne'e tem que regista história ida-ne'e para ita labele ko'alia sala, satán ne'e instituição sira hanesan partido político, para ita ko'alia matéria ne'e loloos perante povo, perante Estado e dignifica ita-nia sucesso histórico, Estado nian, perante comunidade internacional para obra ne'e bele hetan reconhecimento. Mas, ha'u espera

katak declaração ohin ne'e declaração pessoal ida de'it, Deputado ida nian de'it, la representa Bancada. Mas, se representa Bancada mós la buat ida, ne'e história.

Sr. Deputado sira hotu, campo *Greater Sunrise* nia progresso la'ó nafatin. Mesmo que último sete anos liubá la iha continuação ba obra sira Costa Sul nian, IX Governo continua fali reestabelece política desenvolvimento Costa Sul nian ba *Greater Sunrise*. La'ós de'it hein campo *Greater Sunrise*, maibé campo seluseluk iha rai-maran mós continua halo *lobby*, halo aproximação ba *investor* potencial sira atubele mai investe. Portanto, obra sira Costa Sul hanesan segunda fase ba autoestrada, *supply base*, refinaria, la'ó nafatin, mesmo que iha tinan lubuk ida nia laran la iha vontade atu halo andamento, inclui manutenção ba autoestrada primeira Suai mai Zumalai de'it mós husik de'it. Ne'e mak resultado to'ó agora. Ne'ebe, situação ida-ne'e nafatin, em nome Estado Timor-Leste, povo Timor-Leste nian, mandato IX Governo nian continua luta ba ida-ne'e, atu kore ita-nia dependência ba campo *Bayu-Undan*, que mina hotu ona, ho tan dependência ba importação husi rai seluk nian mai ita-nia Rain. Hala'ó nafatin serbisu, la reserva buat ida. Em nome povo ho Estado, IX Governo continua desenvolve setor petróleo iha ita-nia rai-laran. E, IX Governo continua desenvolve potência sira seluk iha minerais nian, ne'ebé levantamento, estudo sira iha município hotu-hotu descobre ona mapeamento bloco sira iha-ne'ebé iha osan-mean, *marmer* no manganês hodi halo promoção ba *investor* sira iha parte minerais nian. Serbisu la'ó nafatin, Srs. Deputados, la descansa.

Atenção ba setor produtivo sira hanesan agricultura, tau nafatin osan ba desenvolvimento institucional agricultura nian, maibé tau mós ba obra infraestrutura nian para hadi'a irrigação, hadi'a canalização sira hotu e mós incentivo ba setor agricultura, setor privado sira bele atrai *investor* sira iha setor agricultura nian ba iha produção hare, natar, ikan ho criação animal. Portanto, la'ó nafatin, Sr. Deputado sira hotu, la iha setor ida que colapso.

Mesmo que iha setor saúde nian mak Sr. Deputado sira sempre temi colapso, colapso, mas atendimento la'ó nafatin, recrutamento, promoção ba quadro técnico profissional sira iha setor saúde la'ó nafatin atubele eleva capacidade atendimento iha setor saúde nian iha território nacional tomak. Setor ida-ne'e todan, maibé IX Governo comprometido atu nafatin buka solução oioin para resolve, hanesan mós iha setor educação.

Questão seluk, Sr. Deputado sira hotu, hanesan acontecimento polícia ho cidadão ida iha Viqueque, comando toma ona atenção, Ministério do Interior mós hanesan. La'ós horas ne'e de'it, la'ós ohin de'it, desde acontecimento, Comando PNTL buka ona contacta ho família sira, hanesan ohin Sr. Deputado Dário dehan, para oinsá bele halo investigação ba motivo acontecimento ida-ne'e husi parte autor nian ka parte Comando PNTL Viqueque. Halo ona contacto ho família para oinsá buka investigação tuirmai sobre problema ne'e nia hun.

Assunto sira seluk, Senhor Deputado sira hotu, hanesan ohin ha'u hatete ona, setor educação nafatin iha problema, maibé ministério nafatin book an.

Kona-ba estrada Gleno – Ermera, Ermera – Letefoho, Letefoho – Atsabe, to’o mós Haubá, Bobonaro nian, Sr. Deputado sira, la’ós ho visita ne’e de’it mak foin hatete atu halo. Ha’u adianta ona iha tinan kotuk, iha fatin ida-ne’e, katak ne’e tama hotu ona iha programa atu halo «tenderização», processo «tenderização» la’o hela. Coincidência ho visita Sr. Primeiro-Ministro nian ho Ministro das Obras Públicas loron hirak liubá iha Ermera halo ema halo ema hanoin katak loron hirak ba ne’e mak Governo foin hakfodak atu declara obra ne’e. La fácil atu regista obra ida tama ba processo aprovisionamento tanba ne’e leva tempo, ne’ebe la’ós ho de’it manifestação ida grupo jovem na’in-hira loron haat liubá Governo hakfodak kedas bá lança projeto iha Ermera. Ne’e sala! La fácil estrada sira hanesan ne’e tama iha lista. Portanto, ha’u hakarak dehan de’it katak Ermera faz parte iha município seluseluk ne’ebé progresso preparativo técnico-administrativo sira la’o hotu ona, hein de’it lançamento. Agora tempo udan, Sr. Deputado sira, saida mak Governo halo agora ne’e atu normaliza de’it dalan sira-ne’ebé, tanba mota, tanba udan boot, rai monu, la’ós halo projeto permanente. Projeto sira permanente, construção sira-ne’e aguarda até udan pára ona sira bele halo mobilização sasán.

Hanesan saida mak acontece iha Lospalos nian, ohin Deputado Armando foti, ne’e projeto para normaliza de’it dalan para bele iha acesso, população bele usa nafatin, mas la’ós projeto permanente. Ida permanente ne’e continua iha preparação administrativa, envolve Ministério das Obras Públicas, ADN (Agência Desenvolvimento Nacional), CNA (Comissão Nacional de Aprovisionamento) para depois acompanha companhia sira-ne’ebé halo ona contrato, assina ona contrato, oinsá, assina ona, nu’usá mak la halo mobilização.

Hanesan ohin Sr. Anacleto foti kona ba Viqueque, Uatulári nian sa’e ba leten Samalari, iha-ne’e hanesan lançamento halo ona, preparativo distribuição material ba terreno e aguarda tempo udan ne’e pára sira hahú sira-nia construção, hanesan mós obra sira seluseluk.

Ha’u sente, assunto sira-ne’e mak ha’u bele fó resposta, seluseluk ha’u sei envia ba colega sira iha ministério para bele fó resposta.

Mas, dala ida tan, kona-ba questão saúde nian, ami husu nafatin Sr. Deputado sira, usa Regimento bele halo debate, convida membro Governo sira mai explica ho mais detalhes kona ba ponto de situação sira ohin Sr. Deputado sira foti, liuliu ba número ema mate ne’ebé dehan katak kaer ba referência Organização Mundial Saúde nian ne’e la normal ona. Ne’e discussão ida interessante tebes, importante, se bele, halo debate ba ida ne’e, Comissão sira bele halo chamada ba membro Governo sira ohin temi ne’e, Ministra, Vice-Ministro na’in-rua, sira disponível bele mai discuti kona técnica halo cálculo estatístico sira-ne’e para mais claro ho dados sira perante povo nia oin.

Obrigado barak, Sr.^a Presidente Parlamento Nacional.

Sr.^a **Presidente** (Maria Terezinha da Silva Viegas): — Muito obrigada, Sr. Vice-Ministro.

Ho nune'e, ita tama ba ita-nia Período da Ordem do Dia, Anúncio da abertura do processo de apresentação de candidaturas para à eleição pelo Parlamento Nacional de dois membro para o Conselho de Imprensa.

Ha'u hanoin, iha-ne'e, iha Conferência dos Líderes liubá, informa tiha ona katak eleição ne'e sei realiza iha próxima Plenária, dia 24 de fevereiro, ho nune'e, informa ba distintos Deputados, liuliu Bancada sira, atu apresenta candidatura membros para o Conselho de Imprensa.

Muito obrigada, desculpa ba atraso do almoço e bom almoço ba distintos Deputados hotu, Sr. Vice-Ministro, boa tarde e muito obrigada.

Horas hatudu tuku 11 liu minuto 55.